

STANISLAI  
KONARSKI  
E SCHOLIS PHS  
OPERA LYRICA.

QUIBUS ACCEDUNT  
OPERA EJUSDEM POETICA  
POSTHUMA.

EDITIO TERTIA  
PRIORIBUS EMENDATIOR

ATQUE AD USUM MAXIME  
SCHOLASTICAE JUVENTUTIS  
ACCOMODATA.

VARSAVIAE,  
TYPIS PP. SCHOLARUM PIARUM.

1826.



K-84/  
181 P

BIBLIOTEKA UNIWERSYTECKA  
im. Jerzego Giedroycia w Białymstoku



FUW0490271

gm



73462

---


EDITOR  
LECTORI.

---

*P*ost deperditas, imo et ab ipso  
Auctore combustas complures,  
quas in juvenili aetate conscrip-  
serat, Odas, paucas quidem has,  
quas colligere potui, in lucem e-  
dendas, r. que pro Viris eruditiss,  
sed duntaxat ad juvandam fa-  
cilis Adolescentibus studiosis ea-  
rundem intelligentiam et captum,  
aliquibus notis esse illustran-  
das, censui. Adjunxi his sermo-  
nes Ejusdem duos, et carmen,  
ab interitu vindicandum ad  
STANISLAUM Poloniae RE-

GEM. *Vanum id quidem et prope temerarium esset, Auctores Latinos nostri aevi, priscis illis Latinae linguae Parentibus, facultatisque Poeticae Principibus comparare. Venusini tamen et styli elegantiam, simplicitatem, ac claritatem, et sententiarum gravitatem, si quis fortasse prae hoc nostro clarissimo Auctore, felicius propiusve assecutus sit, tuo, Lector benevole, iudicio decernendum relinquo.*

---



## ODE I.

AD JOANNEM COMIT.

WIELOPOLSKI,  
PALATINUM SANDOMIRLE.

---

*De-Simulatione hominum.*

**O** fronte clara cui animus nitet,  
Intaminata candidior nive,  
Et artis ignarusque tectae  
Fraudis, et insipiens nocendi!

Nec cerberus, nec bellua centiceps,  
Nec tam Medusae Te caput igneae,  
Terrent, et intortos capillis  
Eumenidum patieris angues;

Vultus dolosi Te feriet magis  
Aspectus: ut qui dulce fluentibus  
Verbis, et improvisa laeto  
Callidus ore tegit venena.

Aperta vis, et fronte palam truci  
Intectus hostis me petat; aut fuga

Subducar, aut non nuda telis  
Objiciam latera, atque pectus:

Sed quem fidelem, quem similem Tui  
Putes amicum, qui caveas? Vaser  
Vel inter amplexus, jocosque,  
Exitium dabit innocenti.

Jam non inepte, noctis adultera  
Somnique proles, (1) exagitat Deos,  
Quod ad cor infesti negarint  
Exiguam male Di fenestram.

Spleni (2) timerem forsán ego Tuo  
Inter cachinnos, quos Tibi Regia  
Cieret isthaec nostra, risu  
Democriti sapientiores:

Nam tum videres praelia dissonae  
A mente linguae. Scilicet iufinis,  
Summisque certatur, prior qui  
Decipiat, meliusque fallat.

Ut pejeratur! perfida credulae  
Illudit ut pars! brachia brachiis  
Miserentur, osculisque (3) fervent  
Ora, genaeque genis cohaerent.

(1) *Momus somno Patre, Matre nocte genitus.*

(2) *Ne splen prae risu rumpatur.*

(3) *In versu 3 Odae Horatianae: Horatius tertio versus pede utitur fere semper Spondaeo. Sarbievio suffecit unum Horatii, aliterumve exemplum: Ode 3. Lib. II. Socis*

Et labra labris, et manni manus  
Inserta, quorum mens odilis flagrat  
Vatiniensis, et proterva  
Ira modum, seniumque nescit:

Quorum (vetustae si qua fides rei) (1)  
Cremes eodem corpora si rogo,  
Se dividat cinis, malignae et  
Dissiliant ab utriusque flammae.

O more Patrum prisca fides! pudor  
Sanctumque verum, non violabiles  
Nexus amicorum, o beata  
Simplicitas, animi nivesque!

Iuste perosae nos hominum genus, !  
Si jam redistis praecipiti fuga  
Ad astra? jam linguamus et nos  
Fana, laresque lupis, et apris.

At fas (2) Zagostj sit mihi vivere  
Tecum (Sorores stamina ni secunt)  
Qui charus es charis amicis:  
E veteri Tibi duxit auro.

---

exitura nos in aeternum. et Odae 19. Lib. II. Disjecta non levi ruina, ubi tertius pes est jambus, ut multis locis eodem tertio pede Jambo usus fuerit; praesertim cum ita voces sint positae, ut nihil senium, sonumque carminis vitient. Hoc sit responsi loco cuidam diligenti nimium Critico.

- (1) *Eteoclis et Polynicis fratrum infesti cineres in rogo se se seperarunt et flammae.*  
(2) *Pagus amoenus in Provincia Cracoviensi.*

Natura mores, sparsit amabile  
 Et toto honestum pectore. Tu mihi  
 Credēris in iuratus ultro,  
 (1) Pace Diis Laribus relicta.

---

## ODE II.

*Vaticinium e Juventutis educatione de  
 futura Republica.*

**D**iscitur mox e pueris Virorum  
 Indoles: primis meliusque se se  
 Omne virtutis, vitiique semen  
 Prodit ab annis

Scire vis, denis, quīs abhinc futurus  
 Sit (2) status (3) lustris? bona Civitatem  
 Fors (4) manet? vel fors mala? sume molli  
 Omen ab ungui.

Castra Praefectis, Patribus Senatus,  
 Curiae (5) Consis, pia templa Mystis

---

- (1) *Non evocando iuramentis Deos lares, per quos veteres jurabant.*
- (2) *Status Reipublicae seu Civitatis.*
- (3) *Dimidio abhinc saeculo, seu 50 annis. Lustrum quinque annos tenet.*
- (4) *Fors, fortuna, Idem quod sors.*
- (5) *Deus consiliorum.*

Quam bonis stabunt? studiis sagax in-  
 cumbe (1) Iuventae.

Inde mansuri cape fata Regni.  
 Qualibus pubeim sibi format ipsa  
 Moribus, tales habitura Res est  
 Publica Cives.

---

## ODE III.

*Ad Clarissimos Juvenes Collegii Nobilium  
 Varsaviensis.*

**C**andidi coetis hominum recentum  
 Nuperi Cives, animaeque magno  
 Additae mundo, faeculae Promethei  
 Vivida flamma: (2)

Quod suum Vobis (3) olor ante lethum  
 Ultimo plectri tenuique nisu  
 Occidit, sciri, repetique dignum  
 Discite carmen.

---

- (1) *Incumbe studiis, id est, considera quibus rebus se se occupet Iuventus.*
- (2) *Promethea igne de Coelo allato homines animasse, Poetae canunt.*
- (3) *Senex Poeta, canus ut olor. Olores mortuos canere, quidam scribunt.*

Adsit hic pubes nisi digna Phaebo:

At sacris exeste procul (1) profani.

Prima res: Divum (2) metus estol prima

Lex Sapientis.

Ni Jovis cautus vereare tela,

Nulla vis legum satis est. Honos quid? (3)

Ipsa quid virtus? quid inane vani

Nomen honesti?

Quod (4) bonis aequae, quis enim malisque

Abnuat? dum sit scelus arte (5) tectum?

Ora nec, felix sine teste crimen,

Pervolet urbis.

Criminis vitam juvat innocentem

Fasque sectari, memores. (6) paratae

Quae piis sedes, quis in impiorum

Pectora vultur

Saevit arguto sine fine rostro.

Nil erit, nil est ita forte, nil plus

(1) *Juvenes profani seu impii à sacro cantu procul este!*

(2) *Dei timor, prima lex hominis sapientis.*

(3) *Honor, virtus, honestum, sine Religione nihil sunt.*

(4) *Quod honesti viri nomen, bonis aequae ac malis denegari non potest. Honestas enim est honoris status.*

(5) *Honesti videntur homines, quamvis occulte peccent.*

(6) *At qui sunt memores alterius à morte vitae, et vulturis aeternum pectora rodentis, illi vitam innocentem ducunt.*

Inque mortales valet, ut futuri

Spesve, timorve,

Inverit post haec memi. esse, (1) tantum

Rege felici, Patria beatà

Nempe felices licet esse Cives,

Esse beatos.

Laeta libertas tibi? quae salutis,

Patrià, spes est, pereunte? Durum (2)

Servitus nomen! ne habent verendum

A Jove quidquam

Pejus, irato, populi protervi,

Namque qui leges violant (3) eorum

Impiis Brontes, Steropesque cudunt

Vincula collis.

Servititem non metuis? quid ergo

Liberum nasci? [pudor et nefas!] quid

Usque nutrirì vetità (4) Tyrannis

Profruit aurà?

Liberis cheu male nata proles

Civibus! Sors o lachrymanda Patrum!

(1) *Secunda à Religione res, cujus Juvenes memores esse oportet, est eorum felicitatem, è Patriae felicitate pendere. Ubi enim erit libertas, ubi salus nostra, si Patria perit?*

(2) *Servitute nihil durius, nec populi pejus à Jove puniri possunt, quam servitute.*

(3) *Brontes et Steropes fabri Vulcani, servilia vincula cudunt in violatores legum.*

(4) *Quid nasci, quid educari profuit in libera gente?*

Cara libertas, quibus empta tanto est  
Sanguinis alvō.

Si tamen vestris fluit ille venis,  
Este virtutis memores Paternae;  
Rebus et jam nunc Patriis, speique  
Vivite magnae.

Vos labor, vos Spartae imitata (1) leges  
Vita, dejectumque (2) decet vibrato  
Missili crustum, procul et petita  
Poma sagittis.

His egent artus studiis, in omnes  
Martios usus. (3) Potior necesse  
Sit tamen Vobis animique major  
Cura colendi.

Mira naturae (4) variumque pondus,  
Atque mensuram, numerosque rerum,  
Hospitem mundi attonitum, novumque  
Nosse juvabit.

- 
- (1) *Durissimae erant Spartae leges educandae Iuventuti praescriptae, labor, fames, flagra, etc.*  
 (2) *In Balearibus Insulis, Matres esurientibus filiis frustra panis et similia jentacula in sublimi trabe ponebant, quae funda jaculo deicerent, atque tum demum ederent*  
 (3) *Exercenda sunt quidem corpora ad bellum, sed major cura animi excolendi esse debet.*  
 (4) *Physicam, et Mathematicam callere, plurimum juvat Iuvenes, novos mundi hospites.*

Proderunt olim cupida retenta  
Mente, per libros meditata (1) doctos;  
Pace dum bellove, Senator, et Dux  
Grandia promes.

Caeteras at res superet cupido (2)  
Tota discendi, bonus arte Civis, quā  
Audias quondam. Huic studio Tibi do  
Lustra quaterna. (3)

Is sapit, prudens, is amatur et Dis,  
Qui comā leni, (4) teneraque tangi,  
Anteit canos bene cogitatis  
Rebus, et ausis.

Ille mox aptus docilisque, pectus  
Molle virtuti sine lite praebet,  
Et regi semper facilis, senili  
Se sinit arte.

Dura, nec fraeni patiens Inventa,  
Immemor, temnensque probè monentūm,  
Objicit quam se male sana certis  
Mille periculis!

Nonne percussum pelagus ruentis (5)  
Icari lapsu? puerique saevus

- 
- (5) *Lectio librorum juvat, cum lecta, et meditata in consiliis pacis et belli promentur.*  
 (2) *At imprimis cupere Iuvenes oportet, ut discant artem, qua boni Cives esse possint.*  
 (3) *Impendant huic studio annos 20.*  
 (4) *Qui à teneris ita cogitat, ita agit, ut canus.*  
 (5) *Notae fabulae Icari, et Phaëthontis è nu-*

Vos monet casus, temere Paterna  
Lora tenentis?

Iam quod extremum moneam: decori  
Anxius, pulchrae juvenisque famae,  
Colchicis (1) herbis fugit, et magis men-  
dacia peste;

Plus venenosi neque scorpionis  
Horret in visu, nec abominandi  
Strigis in plumâ, neque turpis atro  
Sanguine ranae.

Inscius fraudis, niveusque, centum,  
Laudibus praefert, titulisque centum,  
Dicier verus, fideique cultor  
Inviolatae.

Certa, quam solers imitetur, illi  
Norma, mentitus Phocion in omni  
Nec semel vita. Tamen ille magnas  
Rexit Athenas.

Impudens Lethæ pereat Intosa  
Tuscus (2) exosus, malus et magister  
Principum, pravâ simulatione,  
Hosteque veri,

Regias ut qui vitia vitas;  
Qui vafros ac artifices latentis

---

*bibus deciduorum ob neglecta Parentum  
consilia.*

(1) *In Colchide Regione Asiae venenosissimae  
herbae nascuntur.*

(2) *Machiavellus origine Tuscus.*

Callidos falsi, jubet esse, Regum,  
Vappa (1) Ministros.

Vos (2) Aristides ego, Vos (5) Agrippas  
Curiae sanctae precor, atque castris;  
Vosque fortes, innocuos, pios, ju-  
stique tenaces

Opto. Poscendum tacitis ad Aras  
Rite fumantes precibus salubre  
Corpus, ut mens et bona sit: relinque (4)  
Caetera Parcis.

- 
- (1) *Homo nihili, in quo nihil verae virtutis,  
qualis Machiavellus.*
  - (2) *Summus et justissimus Civium Athenien-  
sium.*
  - (3) *Agrippa Augusti Octavii sapiens optimus-  
que Minister.*
  - (4) *Ut Parcae benignae, quam diutius fieri po-  
test, vitae stamina conservent.*

ODE IV.

AD ADAMUM STANISLAUM

GRABOWSKI,

PRINCIPEM EPISCOPUM VARMIIENSEM.

*Mala belli Prussici, esse irae Coelestis effectus.*

O! qui labores tutus inuitiles,  
Aestusque ponti e littore contuens,  
Casus, volubilibusque tecum  
Ipse vices meditare fati:

Qui nunc Britanno, nunc domino maris (1)  
Parere Gallo (2) caerulea conspicias:  
Libensque binarum recensens  
Parta (3) Semiramidum trophaea;

- (1) *Nunc maris victorem Gallum, nunc Britannum conspicis.*
- (2) *Caerulea Poëtis, idem quod maria, quae caerulei sunt coloris.*
- (3) *Binæ Semiramides, duae Imperatrices Romanae et Russiae. Semiramis Assyriorum Regina feminarum celeberrima.*

Non sectus (1) aequè, quos tremis, et colit  
Orbis, thronos tres, Regnaque maxima  
Metire, sabuloque (2) campos  
Et patriis steriles arenis.

Emersit illis, et caput extulit,  
Unita quem vis foedere triplici  
Non terret; Alcides (3) protervus  
Geryonem nihil ut minacem

Expavit, etsi mole tricorporem.  
Qui solus, instar centimani (4) Gigis,  
Se dividit partes in omnes  
Undique (5) lynx, et acutus Argus:

Nunc ense prudens aggreditur pari,  
Cauto retrorsum nunc resilit pede:  
Et perdit, et refert amissas  
Ancipiti sibi Marte palmas.

- (1) *Quos orbis non aequaliter inter Principes sectus, ac divisus colit, Thronos tres, et Regna maxima metiaris ex una parte: notum est: tria magna Imperia arma junxisse contra Regem Borussiae: Austriacum, Gallicum, et Russicum.*
- (2) *Alia ex parte metiaris Marchiam Brandeburgicam totam fabulosam, quae Veteribus Scriptoribus vocatur arenaria S. R. Imperii. Sabloniere du St. Empire.*
- (3) *Hercules ita dictus ab Avo Alcaeo, Geryonem Regem Hispaniae, quem fabulae tricorporem memorant, aggressus: appellatur autem eo nomine Borussiae Regem.*
- (4) *Gigas Briareus centum manuum.*
- (5) *Lynx visu animalium acutissimus.*



Quot foederatis, quamque potentibus  
 Pugnatur armis? illum aries (1) stupet  
 Iam quintus, ut bello recentem,  
 Cingi Equitum, Peditumque nimbo.

Quorumve Regum? quotve superbiae (2)  
 Insultat? ipsa caede ferocior:  
 Unus, novo sceptro, (3) manuque  
 Imperiis tribus hostis impar!

Quin ille dena clade animosior,  
 Majore semper castra quatit metu,  
 Victusque, Victori timetur:  
 Ut metuenda, cruore viso,

Pyrrhi Pelidae (4) terribilis bidens;  
 Aut qualis (5) ictus cuspidis, plus adhuc  
 Ferocit, ac immane rugit  
 Rex nemorum, nemorisque terror;

Et [ni ruentis sisteret impetum  
 Cunctator (6) unus non superabilis]

- 
- (1) *Per quintum, cujus signum aries.*  
 (2) *Superbiae, potentiae, Virgil: Late Regem belloque superbum, id est: potentem. Horatius: Quaesitam meritis sume superbiam, id est: famam et gloriam.*  
 (3) *Regum Europae Rex Borussiae penultimus.*  
 (4) *Pyrrhus, Rex Epiri, ex Peleo et Jove genus ducens, contra Romanos armavit Elephantes. Elephas est duorum dentium, viso colore rubro, vel sanguine exasperatur.*  
 (5) *Leo.*  
 (6) *Daunius invictus Imperator Austriae.*

Daturus horrendas per arva  
 Proxima, perque remota, caedes.

Ter (1) qui et ministram fulminis alitem  
 Expertus, unguisque implacidos, nova,  
 Nec ante vulgatas per artes,  
 Bella, novos meditatur ictus.

Aut ille tandem vincet, et ultimus (2)  
 Ridebit, [ut quae sera dies velit,  
 Latent in incertis!] aut si  
 Dis placet [et moritura vates] (3)

Cassandra, si quod praecinuit malum  
 Omèn Borussia] occidet, occidet:  
 Sed strage, qua textit, tegetque  
 Innumeros prius ille campos!

O mallet enses jungere (4) Noricos,  
 Et Roxolanos (5) ille suis, truces

- 
- (1) *Tribus insignibus victorius Russorum fractus. Imperii Russici, insigne Aquila biceps.*  
 (2) *Proverbium Gallicum; Celui rira bien, qui rira le dernier.*  
 (3) *Cassandra Priami filia, Fates Trojana, quo nomine hic appellatur Mater Regis Borussiae, quae ante obitum, vulgo narratur male ominata fuisse de exitu belli praesentis; Omen tamen vel nullum, vel falsum fuisse, belli eventus ostendit.*  
 (4) *Austriacos.*  
 (5) *Russos.*

In Thracas, attritisque lunae  
Cornibus (1) Odrysiae, (2) Eois

Regnis, et (3) Urbi, demere compedes;  
Quam Christianâ pube, mapalia,  
Patresque grandaevos, et olim  
Iam (4) steriles spoliare Matres!

Non ergo coeli vindicis esse rem  
Putes? aut nostri in generis necera  
Non saeva connivere fata?  
Quot jugulis eget expiari,

Quo victimarum sanguine proli  
Impurus orbis? Credo, (5) Diespiter  
Offensus iratusque, dum igni  
Nubila divideret corusco,

Certos aquarum rumperet alveos,  
Montes abyssis, et pelagus solo  
Misceret, illinc inquinatos  
(6) Turpe thoros, simul inde spretas,

- 
- (1) *Odrysiae, Thraciae, Turciae, idem est.*
  - (2) *Eos, Aurora.*
  - (3) *Byzantio, novae Romae, seu Constantino-*  
*poli.*
  - (4) *Effetas, senes, et jam pridem pariendo*  
*non idoneas.*
  - (5) *Diespiter, Iupiter diei, vel Deorum Pater*  
*cum fulmina jaceret.*
  - (6) *Irreligionem, luxuriam, et injustitiam ul-*  
*turus Jupiter.*

Uturnus aras, et Themidis (1) fugam,  
Hanc ille belli perpetui facem  
Incendit, in caput Nepotum  
Prorsus avis sceleratiorum:

Quibus nefastos Relligio jocos,  
Et thura risus (2) Sardonios movent:  
Qui templa vel temunt supremi  
Caelicolumque, hominumque Regis:

Vel si frequentem, visere (3) fornices,  
Cellasve lenarum, oppidò crederes:  
Qui nosse se testantur, (4) inter  
Nectaris, ambrosiaeque ripas

Divos beato difflyere otio,  
Incurios nostri: à quibus audias:  
(5) *Si sit Deus quisquam? reliquit*  
*Res hominum; regit omne casus;*

*Semenque brutis, ac animis idem est,*  
*Et finis idem.* Sic vetitum bonis,  
Sperare; sic impune pravis  
Omne nefas licuit, licetque.

- 
- (1) *Nota Themidis, seu Astraeae è terris in*  
*Coelos fuga.*
  - (2) *Sardonius, seu stolidus absque causa risus,*  
*vide Solin. c. 4. (al. 10).*
  - (3) *Fornices, loci impuri, à quibus fornicariae*  
*dictae, lenae, mulieres ibidem praesides.*  
*Adverbium oppidò idem quod multum, vel*  
*penitus significat.*
  - (4) *Philosophi Epicurei, qui testantur, Super-*  
*is nullam curam esse rerum mortalium.*
  - (5) *Sermo es impiorum de Deo.*

Astraea terris iussa nocentibus  
 Exesse, jus et flagitio datum:  
 Risitque Praetoris (1) secures  
 Culpa ferox. Scelus omne tutum est.

Metum Deorum, tecta (2) lanugine  
 Exemit actas, jam bene crimini  
 Matura, nec rudis struendi  
 Innocuae (3) pedicas puellae.

Iam nuptiis nil prorsus inest sacri:  
 Iurata flocci Numina. Nec faces  
 Horret vel incestas adulter,  
 (4) Hercyniae cui more Silvae

Fas est solutis vivere legibus.  
 Coelestis haec non ira (5) piaverit?  
 Hoc fonte (6) profluxere clades:  
 Inde gravis mala longa belli.

At nos profano, tela Deum, fera  
 Temnemus ausu progenies? Iovi

- 
- (1) *Praetoris, seu cujusvis judicis.*  
 (2) *Lanugo: pili primum succrescentes, mollesque in barba juvenum.*  
 (3) *Pedicae, quibus pedes capiuntur; pedicas struere, est insidiari.*  
 (4) *Hercynia Bohemica silva pro quavis alia; more silvae, more belluarum.*  
 (5) *Piare, expiare, eluere, idem est.*  
 (6) *Ethnicus quoque Poeta idem fassus est: Facunda culpa saecula, nuptias Primum inquinavere, et genus, et domos: Hoc fonte derivata clades In Patriam, populunque fluxit.*

Infesta jam dudum propago?  
 Dura trucid soboles (1) Typhoei?

Densis Olympus fulminibus ruat!  
 Pudor fateri nos velat impius,  
 Ictus ab ultrice Tonantis  
 Ire manu, pluviasque flammis.

Fas sint scelestis talia. Numini  
 Nos ritè sancto (2) ferre litabimus;  
 Iraeque, quae proccidit enses,  
 Ter placido faciemus (3) Agno.

---

(1) *Fera progenies Typhoei, qui primus Gigantum bella Jovi movit.*

(2) *Pane Eucharistico.*

(3) *Vitulâ, haedo, agno, facere, est idem, quod sacrificare.*

---

ODE V.

AD VENCESLAUM

RZEWUSKI,

PALATINUM CRACOVIENSEM, CAMPESTREM  
EXERCITUS DUCEM.

*De infracto Regis Augusti III rebus ad-  
versis animo.*

**P**rincipis Cari [decet hocce nomen  
Optimos Regum, Patriaeque Patres]  
Principis Cari, mala, qui misertus,  
Uttua sentis. (1)

Cui salus Regis, cui vita Regis,  
Est salus Regni, populiq; vita,  
Si quid, Augusto, metuis sinistri  
Forte? videsne,

(1) *Civis et Senator, quo nullus aut moribus sanctis, aut fide in Reges, meritis de Patria magis conspicuus, aut ingenio et doctrina celebrior, multa excellenter carmine latino et patrio scripsit de Regis afflictis fortuna.*

Qualis (1) Ægei decus, alta rupes,  
Objicit saevo latus omne Ponto?  
Et minas Euri, procul et furentes  
Despicit undas?

Fluctibus tunsae quatinnur, illâ  
Prorsus immotâ, pereuntque naves,  
Glutiunt rictu patulo pilosae  
Corpora (2) Phocae.

Æolus claustris volitans apertis,  
Misceat terris pelagus! quicquid  
Prospicit motis titubare ripis  
Funditus irbes.

Mugiant nubes, gravis ira Coeli  
Fervidos ignes jaculetur! illâ (3)  
Creber, illaesa, resilit caduci  
Fulminis ictus.

Robur invictae solidaeque mentis  
Tale Dis debet, quoties iniquae  
Sortis, Augustus, petitur malignis  
Undique telis.

Densus absumptam populante flamma  
Obruit Dresnam cinis, urbiumque

(1) *Alta quaecunque rupes in mari Aegeo prorsus immota.*  
(2) *Phocae belluae marinae voraces, pelle pilosa instar canum tectae.*  
(3) *Ab illa rupe illaesa creber fulminis caduci ictus resilit.*

Genuna pulchrarum cadit! [O nefastas  
Militis iras!]

Ille deletae Patriae superstes  
Horridi spectat mala longa belli,  
Major Anchise, Priamoque flente  
Rudera Trojae.

Pectus haud illi tamen aere fusum,  
Regiae cladem, populi, Domûsque  
Sentit, ut fas est, tener ut Maritus,  
Ut Pater, et Rex.

Patrii damnum grave Principatus,  
Triste, captivae, simul urbe capta,  
Conjugis funus, sobolisque sanctae (1)  
Pignus ademptum.

Ille sed, volvi bene cuncta, Divûm  
Lege coelesti meditatus, omnem  
Fronte tranquilla placidaque, fati  
Excipit urnam.

Ordinis gnarus, sapientiaeque,  
Conditum nutu moderantis Orbem,  
Se sinit duci, facilemque jussis  
Omnibus aptat.

Ille non rebus tumidus secundis,  
Non et adversis minor est. Urâque  
Prorsus (2) Hussaei Ducis instar, aequè  
Sorte beatus.

---

(1) *Non longe post mortem Reginae Mariae  
Josephae Austriacae, Amelia Reginae  
Hispaniae, Regis Filia obiit.*

(2) *Job Vir de terra Hus.*

Ille quem nullis pavidum ruinis,  
Quem sui semper similem, videbit,  
Si ruat certis, propriisque motus  
Sedibus Orbis.

Regis exemplo sapienter et nos  
Juverit, quosvis ita ferre casus,  
Et frui longa, Pyliosque in annos  
Sospite vita.

Alea immutabilis est Deorum,  
Facta quae de me fuit. Inque Caelo  
Fixa de nobis semel, addo, nunquam (1)  
Interituris.

Saepe mortales inopina terrent,  
Inscios seri peuitus futuri;  
Sed Deus, quae principio carente  
Sanxit ab aevo,

Quae sub aeterna latuère nube,  
Tempus evolvit veniens, diesque;  
Quidque Di pridem statuère, praesens  
Detegit hora.

Sed tamen si nunc male, non deinceps  
Sic erit semper male. Luci opacum  
Cedit. Instat ver hyemi. Corusco  
Mite serenum.

---

(1) *Quae in Coelo semel stata sunt de nobis, ea  
ego addo rebus, quae nunquam interire,  
seu quae nunquam nos praeterire possunt.*

---

O D E VI.

A. D.

V A T E L U M,

DOCTISSIMUM DE JURE GENTIUM  
SCRIPTORUM.

*Saxoniae desolatae calamitates.*

**R**egibus, Musisque, Vatele grate:  
Solius pennâ metuente falsi,  
Saxonum, contra Ducis arma summi,  
Jura tueris (1)

Audii primas docuisse leges  
Nube devectam populos Minervam.  
Te, tuos Cives, hominumque late  
Te genus omne,

Quod licet, quod non licet, edocente,  
Ipsamet per Te erudiisse gentes,  
Et tuo, natura videtur ipsa,  
Ore locuta.

(1) *Bello durante cum Rege Prusso, Vatelus pleraque pro Saxonia scripsit.*

Vi sed injustae, modo fas et aequum,  
Pacis et belli sacra jura, quid sunt?  
Dat suo terris documenta, tristi  
Misnia fato.

O Vitikindi populosa Regna! (1)  
Imperi sed, meliorque pars, et  
Roma, quam dudum peperisse magnos  
Sensit Othones (2)

O et à saxis male nuncupata  
Fertilis tellus! cui nec Tarentum (3)  
Uberem glebam, neque disputet Cam-  
pania felix.

Artium mater: quid enim repertum,  
Callidis (4) Gallis, Italis, Britanno?  
Impigrum quod fors latuit? quod acrem  
Saxona fugit?

Fons opum, multis, medio sub axe,  
Ditibus terris, populisque frustra  
Invidendarum: careas licetsi  
Gange, Tagoque,

Sed quid haec Musae memoratis atrae?  
Hoc fuit nuper, fuit hoc beatum

(1) *Vitikindus, celeberrimus Dux Saxoniae, Carolo Magno Imperatore.*  
(2) *Tres hujus nominis è Domo Saxonica Imperatores.*  
(3) *Urbs magnae Graeciae in Calabria Regione fertilissima.*  
(4) *Scientibus, peritis, sagacibus.*

Ilium, (1) nunc est rogos, ac arena  
Andabatarum (2)

Barbaris quid nos melius? ferinis  
Quidve Centauris, (3) Lapithisque? Plures  
Edidit strages ubi, plus an usquam  
Saeviit hostis?

Oppidis dudum, vacuisque pagis  
Parte centena, cupidus, vel ipsum  
Martiae pubisque laboriosae  
Tollere semen.

Sanguinis, jam bis duodena caedes,  
Miscuit tantum vel humo vel undis,  
Sera vix diras reparare clades  
Possit ut actas.

At nec umius sat erit quieti  
Otium saecli, sinuosus Albis (4)  
Pristino flori bene restitutas  
Spectet ut urbes.

Omnibus tetrae cecinere Parcae  
Terminum Regnis, Sua jam peracta  
Fata sunt istis, eadem relictis  
Imminet urna.

---

(1) *Arx Trojae Regia.*

(2) *Gladiatores, seu populi, qui clausis oculis digladiabantur.*

(3) *Centauri, medii homines, medii equi.  
Lapithae, populi Thessaliae bellis continuis,  
caedibusque clari.*

(4) *Fluvius Saxoniae, infra Hamburgum in  
Oceanum influit.*

Omnibus sors haec metuenda. Nam quis  
Eximat duris vicibus vel unam  
Gentium, vultus variante Luna  
Inferiorum? (1)

Haec cadunt, his mox aliae resurgunt  
Fortiores alterius ruinis:  
Quae novis cedent: neque parceret istis  
Seriis aevum.

Fallor? an quisquam melior Deorum,  
Auguri Vatem monuit sinistri?  
Spes bonas laevo (2) tonuitque Coelo  
Laetius omen?

Mercium sedes, et amica Musis,  
Tempus ut saevi fuit ante belli,  
Copiae, sic post erit, audietque  
Lipsia cornu.

---

(1) *Gentium, quae sunt infra Lunam, vultus  
continuo variantem.*

(2) *Auspicia faustiora erant e laeva, quam  
e dextra regione Coeli: Laetius omen to-  
nuit, seu intonuit nobis spes bonas.*

---

ODE VII.

IN ILLUD POETAE:

SI VIS NUBERE, NUBE PARI.

CUM ADAMUS, DUX IN KLEWAN ET ZUKOW, PRINCEPS CZARTORYSKI, GENERALIS TERRARUM PODOLÆ PÆRLECTUS, ELISABETHAM COMIT. DE FLEMING, SUPREMI MAG. DUCATÛS LITHV. TESSAURARIÛ FILIAM, SIBI CONNUBIO FELICI JUNGERET, 1761. d. 19 NOV.

**E**t pares secum sociare dextras,  
Et pares inter similesque, sacris  
Nuptiis, gaudent hilares adesse  
Dique Deaque.

Sorte quid faustâ, meliusque lectum  
Par ut est istud? quod utrinque jures  
Invicem natum sibi, grande seri  
In decus ævi.

Ea Jgellonum serie vetusta,  
Si Ducem clarum traho? par origo

Ex Avo Nuptae: propiusque se fons  
Dividit idem (1)

Parte jam quantum thorus ex utraque  
Splendeat? quali radietque luce  
E Sieniavitis, Lubomiriisque,  
Valsteniisque?

Balthici quondam Domini potentes  
Littoris, quanto, veteres Flemingi, (2)  
Nomen illustrent, thalamosque Sponsae  
Lumine? specto.

Quaevæ fortunæ coëunt in unam,  
Cerno privatos superare census:  
Ipse sed novit Plutus, haec, an ille,  
Ditior Haecres?

Hic opes, aetas, genus, et venustas,  
Mutuo certant, parilisque virtus,  
Dona naturæ, simul et magistræ  
Palladis artes.

Dira nec Latona, (3) Parens, jugandæ  
Anxiam quæ das operam juventæ,  
Lectius quidquam numeres, perenni  
Foedere junctum.

- (1) *Duces Czartoryscii Magnus Cancellarius Lithvanicæ, et Palatinus Russiæ Fratres germani, hujus Filius Princeps Adamus, illius ex filia Neptis Elisabetha Flemingia.*  
(2) *Flemingorum Comitum familia potens et illustris in Pomerania.*  
(3) *Latona Dea apud Veteres connubiorum.*

ODE VIII.

AD JOSEPHUM DE PRUSSIS PRINCIPEM

JABŁONOWSKI,

PALATINUM NOVOGRODENSEM, EQVITEM S. SPIRITVS.

SERMONĒ CUM EO HABITO

*De Patriae Libertatis incuriis, et  
proditoribus.*

**S**i Te sollicitum tuae  
De fatis Patriae, saepe quatit metus,  
Si rebus, prout assoles,  
Prudens, Imperii Sarmatici, times,  
Heroum Soboles, Avis,  
Princeps ac Atavis edite fortibus;  
Segni Pieridum choro (1)  
Linquamus tenerae ludicra tibiae,

(1) *Linquamus, ut otiosae Musae cantent ludicra et dulcia: nos res ipsa monet, barbyton, seu lyram tristem sumere, et plectrum flebile, quod vel durissimum, ut aes triplex, pectus in planctus solvat,*

Et dulcem strepitum lyrae.

Nos res ipsa monet, barbyton asperam,

Et tristem gravibus modis,

Ac plectrum potius sumere flebile,

Quod vel pectoris aes triplex

Solvat, si scopulos mollit Orpheus,

Si praedam tulit inferis.

Aures carminibus pandite, vos quaeis

Libertas nihili Patrum:

Tanto quae Proavis sanguine constitit.

O Cives male Liberi!

Donum, binae (.) opibus ditius Indiae

Quo majore carent Dii,

Donum, quo melius nullum homini datum est,

Utro perdere? quis furor?

Quidquid reptat humi, vel secat aëra,

Aut ludit tepido mari,

Devitat pedicas, rete fugit, capi,

Ac esse acrius, timet.

Auceps viminibus texat ut aureis,

Et gemmis caveam, vafer,

Mellitas Arabum figat arundines, (2)

Si quid suavius et thymo:

Auro quippe nitens undique, liberam

Intus, carcer, avem trahet?

An structam Paro (3) marmore Regiam,

*si verum est, quod cantu lyrae Orpheus scopulos mollierit, et Eurydicen ab inferis revocaverit.*

(1) *Orientalis in Asia, Occidentalis in America.*

(2) *Ex quibus in Arabia Felici dulcis succus exprimitur.*

(3) *Ex Paro Insula Archipelagi.*

**Quo**quò vult volucris vaga  
 Campis aëreis, et nemori suo, et  
**Vasto** praeferet aetheri?  
 Includine sinet, se crate ferrea  
**Utro**, magnanimus Leo?  
 Sessoremne suum sponte feret, libens  
**An** fraenos equus induet?  
 Non invisa cui sit sua servitus?  
**Vo**edet vos nisi, liberos  
 Natos esse? piget vos nisi originis  
**Nolentis** dominum pati?  
 Vos? Vos Sauromatae? olim genus inscium  
**Et** Romae et Capitolii? (1)  
 Clari posteritas inclyta vos Lechi?  
**Nam** quid, [proh pudor et nefas!]  
 Sanguis Patricius non facis immemor,  
**Quo** non exitum Tibi,  
 Quo non vincla pares? Serius, ocyus,  
**Damno** non reparabili,  
 Pulchro jure Patrum degener excides:  
**Servilis**que probrum notae,  
 Venalis, timida fronte, geres nepos,  
**Ternat** quem generosior, (2)  
 Cui quaesita neget Phyllis et oscula,

(1) *Qui nescitis Romam et Capitolium. Nam Sauromatas nunquam Romana potentia vicit.*

(2) *Quem Phyllis, seu cara Uxor, nata libera, dedignata ut Virum servilem contemnat, cui oscula neget, et illi his vocibus contumeliam exprobrat: O! Vir quid Te ve-sordius, quid miserabilius, qui cum sis natus liber, fecisti te mancipium, ut Pa-rias ex Te servos, sisque Caput et parens*

**Dedignata** Virum, cui  
 His contumeliam vocibus exprobrat  
**Quid** vecordius? ipsemet  
 Ortus liber, Avis ac Atavis Tuis,  
**Servos**, quos paries, dein  
 Addes, mancipiis tu caput et parens,  
**Tradant** quae Domini asperioribus,  
 Post se se Domini asperioribus,  
**Augustique** Neronibus?  
 Cyri namque, Titi, aut Aurelii, quot?  
**Heu!** quò praecipitem trahunt,  
 Imprudens quereris, fata Polone te?  
**Quid** frustra immeritis, levis  
 Insectare Deos? dic peto sanius  
**Quo** me ducit in horridam  
 Libertas temere versa licentiam!  
**Legum** nomen inutile. (1)  
 Nequaquam regimur legibus, at mali  
**Nos** leges regimus. Tamen  
 Exleges populos dicere barbaros  
**Fas** est, et pueris licet.  
 Privatae cuivis tantus amor rei,  
**Ut** vel pernicie suae,  
 Et fasces, et opes quaerere Patriae,  
**Prosit** Civibus impiis.  
 Nil illis Patriae, nil Reipublicae

*nasciturorum mancipiorum, quae tradant Augusti Neronibus, id est boni Principes Tyrannis. Boni enim Principes, uti Cyri, Titi, Aurelii rarissimi sunt.*

(1) *Deplorat legum contemptum, extinctum quae amorem Patriae, quo Romani, et Graeci tantopere suam Patriam prosequuntur.*

Usquam nomine inanius:  
 Riderique potest, qui memoret, sua  
 Pro Roma cupidos mori,  
 Brutos, et Decios et Fabium genus,  
 Aut qui, nil nisi gloriae  
 Virtutisque avidos, caetera pauperes,  
 Prae Persis opulentibus  
 Laudet Spartiatis, et Lacedaemona.  
 Astraeae (1) quid ego fugam?  
 Impunem scelereum quidve proterviam?  
 Tacta Altaria Judici  
 Perjuro? immemori fulminis et Jovis?  
 His Urbes periêre tot!  
 Haec tristem minitant gentibus exitum:  
 Cudunt implacidi Dij  
 His in genua graves libera compedes.  
 Jam quid certius! ultimum  
 Si non exitum nunciat oscinis (2)  
 Regno fatidicus, cui  
 Desunt arma foris, consilium domi?  
 Si Vates cecinit bene,  
*Vis consilii expers, mole ruit sua,*  
 Et quidquid viguit, perit.  
 Sed jam rauca (3) mihi fila prementibus  
 Respondent digitis: diu  
 Tensae, languet iners et Citharae sonus;  
 Nec tantum mihi flammis (4)  
 Princeps, quanta tui vis calami. Tuum est

- (1) *Deplorat Astraeae, seu Justitiae exitium.*  
 (2) *Avis auspicium ore canens.*  
 (3) *Sed jam mihi fila lyrae rauca: nec bene respondent digitis prementibus.*  
 (4) *Neque tantum mihi est spiritus o! Princeps, quanta vis inest tuo calamo, qui in omni genere multa doctè scripsisti.*

Cunctis scilicet artibus  
 Doctas addere res, et nova lumina:  
 Nullum ferme genus tuis  
 Intactum studiis. Tu Zoroaste, (1) tu  
 Archimede Magistro, iter  
 Astrorum sequeris et vaga sidera.  
 Turursum cupidus, vias  
 Naturae ac animi scire reconditas  
 Stoa, (2) Teque Platonis  
 Misces discipulis, et Samii senis. (3)  
 Jam vel lucida (4) Sardonyx, (5)  
 Vel geminis facies eruta Caesarum, ac  
 Nummis, quae nit et aureis,  
 Aut incisa notis marmora publicis,  
 Noscendi te avidum movent.  
 Prisci cura tenet Te quoque temporis;

- (1) *Zoroastes Bactrianorum Rex Astronomiae peritissimus. Archimedes Syracusanus celeberrimus Astronomus.*  
 (2) *Porticus Athenis celeberrima Poecile dicta, in qua Zeno Auctor Stoicae Sectae Philosophiam profitebatur. Stoa vox graeca, non latina.*  
 (3) *Pythagoras è Samo Insula oriundus.*  
 (4) *Sardonyx genus gemmae coloris rubei à Sardis primum repertae.*  
 (5) *Laudatur Princeps à rarissima collectione veterum gemmarum cum vultibus Caesarum, et aliorum Heroum, à cognitione Veterum inscriptionum, à studio Historiae, à Genealogiis Principum Poloniae Familiarum editis, à vitis Imperatorum Polonorum descriptis.*

Et nunc cantus origines  
 Regnorum dubias, et variam vicem  
 Scrutaris, modo posteros  
 Majorum titulis, et serie mones,  
 Quonam sanguine sint sati.  
 Per te vita redit fortibus et bonis  
 Post mortem Ducibus: Viros  
 Et pennam revocas immeritis mori:  
 Quorum pro Patria datae  
 Ingentes animae, pulchraque vulnera,  
 Virtutem melius docent,  
 [Torpentem penitus, sistimulo caret]  
 Exemploque potentius  
 Incendunt veteris pectora frigida  
 Libertatis amore, quam  
 Altera, gracilis fistula cum Lyra.

### O D E IX.

*Execratio in malos Cives, proditoresque  
 Patriae jacta.*

**C**oelo tonantis justa Jovis ihannus  
 Centum coruscis ignea nubibus  
 In Patriae prolem scelestam  
 Horrisono plue tela nimbos!

Sinesne saevas rodere viperas  
 Grae Parentis viscera? Si tamen (1)

(1) *Si in vita praesente scelera impunita triumphant, si bonos hic pati oportet.*

Lenti Dii sunt, impiove est  
 Jussa sequi pede paena claudo,

**Felix**que crimen ridet, et omnia  
**Virtutis** aufert praemia si scelus,  
 Si forte sors praesens honorum est,  
 Dira pati nisi spe futuri?

**At** parte saltem jam (1) Stygis altera  
 Di fraudulentis Ixionis rotas  
 Parate! fumantesque taedas  
 Tisiphones, simul et sororum:

**Pasti** Medusae pectora sentiant  
**Virus** colubri, rostraque vulturis  
 Edacis, aeternosque morsus,  
 Et Phrygii labra sicca Regis. (2)

### O D E X.

IN IMPIUM POETAM.

*Quicumque sit Auctor carminis de terrae  
 motu Ulyssiponensi.*

**J**mpie! quid quereris? vesane! sceleste quid audes?  
 Tantane rabie innoxios petis Deos?

(1) *O saltem in altera parte Stygis, seu in altera vita meritas luant poenas!*

(2) *Tantali.*

*Innocuae quare à virtutis. Jupiter, ictu* (1)  
*Orditur! et cur crimen haud prius ferit?*  
 Heus tu! si crimen, Divùm prius ira feriret,  
 Quot obruisset jam tuum telis caput?  
 Tu vivis! coeloque moves Titania bella:  
 Typhoea proles! et manus gravis Jovi.  
 Fallor! an aridet nomen tibi forte Gygauntis?  
 Hoc ne timescas rectius de te canam:  
 Vivis! et insultas toties? impune? tot annis  
 Divinitati? vilis et foetens cimex!  
 Ingenio [fateor, quod non praestantius ulli]  
 Ut destruas, quidquid sacri est, tantum vales?  
 Nam tibi qui metro praestet, levio reque plectro,  
 Scribatve melius, cogitet pejus, quis est?  
 O he! sis sapiens! ast haec sapientia, quanti est?  
 Cui cum pecoribus est idem summum bonum (2)  
 Lotus fonte sacro [si jam id tibi dicere fas est]  
 Non noscis aliam Cypriam praeter Deam.  
 Tu sacra, tu Divos, tu nostra altaria temnis:  
 Pectus tibi, ipsis Gnidiae (3) votis calet:  
 Avis digna tuis sola est et thure voluptas:  
 Religio, Musis risus et jocus tuis.  
 O hominum faecem! tanto cui spernitur ausu  
 Lex Christiana! *Legis et Laor Deus,*  
 Ridetur etiã, mens reatrix *improvida mundi,*  
*Infauستا virtus, semperque beatum scelus,*  
 Cui Deus errat, et hunc dudum malè dirigit orbem:  
*Solisque nostrum casibus linquit genus.*

(1) *Auctor carminis de terrae motu arguit Deum, et facetè quaerit cur Ulyssiponem piã et religiosam Urbem, et non potius alias impias everterit.*

(2) *Voluptas corporis.*

(3) *Cypria, Gnidia Venus in Cypro et Gnida culta.*

*Justitiae nomen cui nil, nisa vana chimerae*  
*Imago, quam qui ridet, est felix latro.*  
 Ipsos saeva pati nisi fata, piosque, probosque,  
*Favere Superos impiis, terra, mari.*  
 Haec dum dira vomis noctuque dinque, triumphas?  
 Non te Tonantis ol. rutam flammis ad huc?  
 Sc' sine? alium, cecinisse Epicuri de grege porcum: (1)  
 Paenam scelestos insequi *claudio pede?*  
 Durum me dicas sacrumque? videlicet in Te  
 Nobis nihil? Tibi in Deos tantum licet?

(1) *Horatius ita se ipsum nominat.*

ODE XI.

AD

COMITEM ARANDA,

PRINCIPEM VIRUM OPTIMATEMQUE HISPANIE, EQUI-  
TEM AUREI VELLERIS, NUPER LEGATUM CATHOLICÆ  
REGIS AD REGEM ET REMPUBLICAM POLONIE; DEIN-  
DE SUPREMUM HISPANIE EXERCITUS BELLO LUSITA-  
NICO DUCEM.

*Post pactas condiciones Pacis 1762  
decantata.*

NOMINE CIVITATIS VARSAVIENSIS.

**D**ux Aranda, Atavis edite ditibus, (1)  
Nostræ delictum dulce, Tuæ decus  
Gentis, laurigeræ Martis in otio,  
Jam nunc ecquid ages manu?

Prudens, inter eos non ego Te Duces  
Ponam, flamma, cuius, queis placet, Urbium.

(1) *Familia Aranda hæreditario gaudet titu-  
lo, homme riche d'Arragon.*

Qui turres sepelit, tecta ruentia, et  
Moles aequat humo graves.

Victori placeant rudera barbaro,  
Ac gratus vacuis sit sonus aedibus,  
Et desertus ager, fana, lares, domus  
Olim non habitabiles;

Sed concessa feris tuta cubilia  
Apris, atque lupis antra rapacibus.  
Te mitem genuit, nec cui lenius  
Natura ingenium dedit,

Si Te præcipitem vividus impetus  
Hostes in medios perpulit, hostibus  
Instar Te voluit fulminis: at bonum  
Victis, Te voluit Patrem.

Tu (1) luges miseros, Tu pia lumina  
Oblectare caves cladibus horridis.  
Te suspiria lamentaque Virginis  
Spansi funera flentis, et

Voces militibus dira precantium  
Matrum, Te tenerarum agmina Conjugum  
Longas sparsa comas, saevaque praelia  
Detestantium inaniter,

Te tristis senii flebilis orbitas  
Moerentem lacerant, non secus ac Tuis  
Dammis atque malis; illachrymantibus  
Haec spectas oculis Parens.

(1) *Te moerentem lacerant suspiria, lamenta,  
et voces Matrum, agmina Conjugum, or-  
bitas senii, etc.*

Non fustum aere Tibi pectus ahenem.  
 Insunt mollia praecordia. Quin piget  
 Te mox, cernere, si vel tacitus dolor (1)  
 Udis excubat in genis.

Ingens fama, decus (velificans cui (2)  
 Heroes, proprio sanguine Civium  
 Mersuri Patriam, Regnaque tristia)  
 Non tanti tamen est Tibi,

Vitam non reputes Civis ut unius  
 Pluris. Disperseant! queis hominum cruor  
 Vilis, sarta sui qui capitis, nece, et  
 Terrarum excidio parant.

Jam cum sis animo, qualis inest Tibi,  
 Nil humanius ut Te sit, Ohe! quibus  
 Non te continuo laetitias eâ  
 Incessisse putem die?

Quâ consanguineae Pax Lusitaniae  
 Affulsit. Sed enim gaudia quae simul  
 Devexit trepidanti Oceano Tagus? (3)  
 Quove urbem eripuit metu?

Non sic, si Libyci (4) se catuli novis  
 Felix explicui caprea dentibus,

(1) *Cernere non potes vel tacitum dolorem, qui excubat in genis udis, id est quae lachrymis conspersae sunt.*

(2) *Heroes famae velificant, seu famae inseruiunt non parcendo sanguini suorum Civium.*

(3) *Flumen ad Olyssiponem.*

(4) *Olyssipo Princeps Urbis Lusitaniae ex-*

Rupes laeta salit, summaque montium  
 Vix tactis quatit unguis;

Non sic armigeram si Jovis alitem, et  
 Ungues implacidos fugit avis, nemus  
 Cantu implens, volucres ad modulamina  
 Centum vocibus evocat;

Non sic hostia, quae jam prope sanguine  
 Manatura, sacris colla securibus  
 Subduxit, subito libera, currit, et  
 Raptis funibus exilit;

Ut jam nunc hilares laeta dies agit,  
 Impendente diu functa periculo,  
 Et casura Tuae victima gloriae,  
 Olyssippo mari potens.

Sic jam Pax nivea nube super redux,  
 Felicis populos visit Iberiae, (1)  
 Quam cornu sequitur divite copia,  
 Ac spargit bona Faustitas

Et fruges, et opes munificâ manu,  
 Quam cingunt comites et Themis, et Fides,  
 Terra ut sitque mari jus cuivis suum,  
 Nec leges sine moribus.

*tremo periculo erepta, quâ laetitiam incesserit, terna similitudine illustratur: Caprea dentibus Leonis explicatâ, Alite ex ungue aquilae elapsâ, Hostiâ, quae collum securi subducit, et rupto fune exilit.*

(1) *Hispania ab Ibero annâ Veteribus nominata.*

Jam tutae volitant per pelagus rates,  
 Portus quaerere nec cogitur inuis  
 Mercator, timidus cedere Nereo, (1)  
 Aut praedonibus omnia.

Et pagos vacuos, et vacua oppida  
 Jam Lucina (2) novis prolibus anxia  
 Instaurare, parat criminis inscius  
 Castis connubiis thoros.

Has res, haec hominum laetius otia,  
 Captarum spoliis aspicias Urbium:  
 Nec fas esse putas, ut Tibi laureae  
 Humani generis bono

Constant. Innumerus pax potior Tibi est  
 Semper visa triumphis; nec obesse, (3) vis  
 Major, si interea cedere tempori, et  
 Fortunaee jubet impari.

Nam belli cecidit si secus alea?  
 Rebus, quas homini nosse datum, optimis  
 Pax semper melior, propitio Jove,  
 Rerum damna resarciat.

(1) *Mari. Nereus Deus maris.*

(2) *Dea parturientium.*

(3) *Non videtur Tibi id quidquam obesse gloriae Regni, si major vis cedere jubet tempori, et fortunae majori. Magna Britannia eo bello, meliore fortuna usa est in America, quam Hispania, quae ob Cubam, Havanamque recuperandam coacta fuit bello desistere.*

Curas mitte graves. Sollicitam Tibi  
 Mentem gratuito ne quantiant metu,  
 Venturi [cave] praesagia temporis:  
 Cautis linque futura Dis.

In mentem revoca gaudia, Regiae  
 Quae nostrae dederas; Festaque, copia,  
 Pompâ, compositis rebus, et ordine,  
 Graiis aemula coetibus. (1)

Tunc jam diximus: ut rarum habitura sunt,  
 Exactumque Ducem castra! (2) Probat Viros  
 Disciplina, rei que ordo domesticae,  
 Summis Imperiis pares.

His Te dignius, aut magnificentius  
 Pulchris Varsaviae nil fuit otii,  
 Quis Urbem, Proceres, millia Civium  
 Traxisti. Sed enim deus

Quis Te Sarmaticis gentibus invidus,  
 Ad metas properantem Herculis (3) ultimas,  
 Nostris eripuit semper amoribus  
 Quaerendum? Reliquum quid est?

Jam nobis? nisi Te perpetuis palam  
 Votis, omnibusque ac precibus sequi:

(1) *Tam bene ordinata festa publica, ut apud Graecos celebrioris ludi.*

(2) *Qui domum et familiam propriam bene regit, bene rector putatur Civitatem, et exercitum.*

(3) *Metae Herculis. Gades Insulae in ora Hispaniae Baeticae ad Oceanum sitae.*

Tranquillum, incofumem, Te Patriae diu  
Servent ut Superi Tuac.

Dum faecunda mari Vistula Balthico  
Messes Sarmatiae devehet annuas,  
Servabit memori Sarmata pectore,  
Quas Aranda potens, opes

[Totus deliciis dum populi vacat]  
Hic fudit: Veterum sacra, (1) Quiritibus  
Ne sint invidiae, munera Caesarum  
Saturnalibus edita.

---

(1) *Ne sint invidiae Quiritibus, seu liberis Polonis nobilibus, munera Caesarum, quae edere solebant Romae, festis praesertim Saturnalibus.*

---

---

## O D E XII.

AD

CLARISSIMUM JUVENEM  
VINCENTIUM POTOCKI,

PAULO ANTE E COLLEGIO NOBILIUM EGRESSUM,

DIE EJUS NOMINIS.

---

*Quo suo jam vel ab hac aetate respondeat Nomini, Vates illi offert exemplum Scipionis, qui captam Carthagenae Puellarum formosissimam, Filiam Regis Ilgergetum, connubio, Allucio Juveni Celtiberorum Principi, promissam, intactam eidem reddidit; ingentemque auri summam ab Allucio sibi oblatam, spre tamque, doti Regiae Puellae adjunxit, ita simul libidinem, avaritiamque continentissimus Adolescens vicit.*

U t Tuo jam Te similem paremque  
Nomini praestes, quid agas? Trophaea  
Fac refer de Te potiora, vince  
Temet et ipsum.

Ille Romanâ Juvenis, suâque  
Gloriâ major, Libyaeque terror,

Norma sit, clarus minus Africanis.  
Scipio lauris,

Regiam quam dum (1) [cui cedat ante  
Ceteras, pomum Cypriae,] Puellam,  
Insciam noxae, nimium stupenti  
Reddidit hosti.

Tela sic fregit, nec acutiore (2).  
Alitis vinci pueri sagittâ  
Passus, immenso neque Celtiberi  
Principis auro.

O triumphator (3) Paphiae, Plutique!  
Quippe quid majus Duce continente?  
Quo magis dudum tumuit superba  
Roma triumpho?

Sic opum nec Te superet cupido:  
Non et à porco sene dicta turba: (4)  
Molle, si virtus, studiumque famae,  
Pectus adussit.

Te probi mores, pietasque fuci  
Nesciens, laus et cito profuturi  
Ingeni, rebus Patriae, Tuisque,  
Largius oruant.

---

(1) *Cui cedere debet pomum Veneris Cypriae  
inscriptum: detur pulchriori.*

(2) *Vinci non est passus Cupidinis alitis pueri  
sagittâ.*

(3) *Veneris ita à Papho dictae, et Pluti divi-  
tiarum Dei.*

(4) *Non te superet Epicurea turba. Horatius  
se ipsum vocat Epicuri de grege porcum.*

Di spei nostrae, nec inane de Te  
Magna spondenti mihi, Di benigni:  
Annuant! at tu memor esto effati  
Vatis amici:

Semper Heroum, Venus, est venenum:  
Herculem (1) fuso subigit ferocem:  
Et bonae menti, sapientiaeque  
Dissidet omni.

---

## O D E III.

### PAEAN AD CHRISTUM,

*De castis tribus Josephis.*

**N**ate Divina sine labe Mente,  
Auctor et casti sacre fons amoris,  
Fonte, cristallo, nive, luce solis  
Purior ipsâ.

Quanta pulchrorum tibi liliorum  
Messis assurgit! Tibi quanta neectunt  
Integri vitae, scelerisque puri  
Serta Josephi!

---

(1) *Hercules cum sua Omphale fusum duxisse  
memoratur.*

Nam Duces sancti rigidos honesti,  
 Laude virtutis similes eadem,  
 Terna Josephos Superis, et Orbi  
 Protulit aetas.

Unus incestam Dominae pudicus  
 Vicerat flammam Juvenis, tulitque,  
 Dum fugit, clarum, sine teste, Coelo:  
 Teste triumphum.

Alter inuuptae, celebrisque miro,  
 Virginis, partu, Comes, atque Custos,  
 Arbitr, tutor, Pater educati  
 Numinis almus.

Tertius lustris decies novemque,  
 Integram Coelis animam fidelis  
 Rite servavit, niveamque claris  
 Intulit astris.

Prospero pugnax animosus infans  
 Marte, devicta styge, (1) castitati  
 Vixit aeterno, sapientiaequae  
 Foedere junctus.

Sic et exemplum docili Juventae,  
 Et modos vitae dedit innocentis;  
 Nescius culpae, maculaequae,  
 Omnis et expers.

Hospitis nomen bene Nazareni (2)  
 Gessit, ac ejus bene nomen et rem, ]

(1) In tenera aetat pluries feminarum ille-  
 cebris impetitus, eas elusit, et vicit.

(2) Hospitis Nazareni, Josephi Sponsi Vir-  
 ginis.

Prisca, quem dudum coluere Patrem  
 Regna Canopi. (1)

Hujus ad laudes, et honore digni  
 Bethleemitae, Calasactique, (2)  
 Virgines spargant, puerique dextris  
 Lilia plenis!

Hi Juventuti Pugiles, Ducesque  
 Aspici digni! scopulos pudoris  
 Inter et syrtis, et in omne prou  
 Dedecus Orbis..

Nunc Cataclysmo (3) denuo meretur  
 Elui tellus, prope nunc honesti  
 Pulsa lex, lapsis, vitiosiore  
 Vivitur aevo.

At libens castas, vacuasque noxae,  
 Qui colis mentes Deus, atque puris  
 Rite placaris manibus sub albi  
 Tegmine farris,

Conjugum serva thalamos fideles,  
 Et puellarum, Juvenumque mores  
 Fraudis ignaros, scelus omne castis  
 Urbibus arce.

(1) Aegypti, à Canopo Urbe ad ostium Nile  
 sita, ita dictae.

(2) Familia pervetus et illustris Hispaniae,  
 Parens Josephi Calasactii.

(3) Diluvium universale.

---

O D E IV.

IN VERBA SALOMONIS.

*Revertetur pulvis in terram suam, et spiritus redibit ad Deum, qui dedit illum.*

[ECCLES. CAP. 12.

A D

DURANDUM,

MINISTRUM GALLIE APUD REGEM, ET REMPUBLICAM  
POLONAM.

---

**F**rustra (1) virentis flore superbiens  
Aetatis, annos quos sibi dempserit,

- (1) *Frustra proterva Virgo, superbiens flore virentis aetatis annos aemulae suae ad- dat, quos sibi dempserit; moris enim est, ut puellae suorum annorum numerum minu- ant, puellisque aliis annos augeant: Fru- stra proterva Virgo, et arrogans Puella, quae ita se formosam existimat, ut prae Venere pomum illi à Paride debeatur; frustra, inquam, se continuo in speculo contempletur.*

Apponat, aemulaeque tradat,  
Innumerisque procis triumphet

Proterva Virgo, prae quoque Cypria  
Pomum mereri se putet, arrogans  
Puella, depictum repente (1)  
In speculo, meditata vultum.

Frustra jocosa captus imagine, (2)  
Tensa manu se quaerat; et alterum  
Miretur, immotisque nautem  
Semet amet puer albus undis.

Frustra ligustris, atque rosis, nivi  
Et certet ipsi, pocula qui Jovi (3)  
Praebere semotà, jubetur  
Prorsus Hebe tabulis Deorum.

Desaevit aequo pallida mors pede  
In omne pulchrum, turpius et nigro

- 
- (1) *Nullibi ocyus magisque repente, quam in speculo vultus depingi solet.*  
(2) *Frustra Hylas sua in fluvio imagine cap- ptus ad illam manus tendit, et se in aquis quaerit, seque ut alterum miratur, et na- tantem in undis semet amat, in quas cum incedisset, mersus, in Hyacinthum muta- tus fuit.*  
(3) *Ganymedes substitutus in locum Hebe a- motae à mensis Deorum; frustra, in- quam, hi omnes pulchritudine formae sibi placeant, cum mors in omne pulchrum, et in omne turpe aequè desaeviat.*

Thersitis à Pelide caesi, (1)  
Et Phrygii senis ore foedo. (2)

Formosa quaevis, hisque nihil minus (3)  
Furore caeco proterit Atropos:  
Cardos et urticas, et una  
Lilia, trux, violasque miscet.

Luto quod exit, scilicet in lutum  
Redibit. In se rursus humus trahit,  
Et quidquid effudit, resorbet  
Cuncta sinu capiente tellus.

Ex se renasci provida, perpete  
Natura gyro volvitur: et rotâ  
Vertuntur aeternâ suisque  
Se reparant elementa damnis.

At sint idem isthaec, nascier, et mori,  
Ludantque notum terrea circum, (4)  
In pulverem, si pulvis, atrum,  
In veterem, sua terra, terram,

Indesinenti si remeent vice:  
Diversa (5) multum sors animis data est!

(4) Thersites turpis, et convitiator Achillis, à quo pugno occisus. Achilles Pelides, Pelei filius.

(5) Aesopi ore.

(6) Hisque nihil minus, id est: nihil minus, quam formosa, proinde turpia, proterit Atropos, seu mors.

(4) Terrestria omnia in circumloqui videntur, id est: cum tempore quasi in suum locum redire.

(5) Si terrena omnia in terram indestinenter

Mortale nil inhaesit illis,  
Nil, quod humus repetat, caducum.

Igni caloris, ponderis et solo  
Nil debet, udo nil quoque Nerco,  
Aut aëri nil molle, rerum  
Principiis animus quaternis

Nil debet. In se totus et integer,  
Non sectilis; nil compositus, proin  
In quasque dissolvi recusat  
Posse, quibus caret ipse, partes.

Nec esse putum materiae modum  
Affirmet, herbis quem male Colclucis

---

remeant, animorum sors est alia, hi enim in terram non remeant, nam nil caducum illis inhaeret, quod humo, seu terrae debeant; nil igni caloris, nil ponderis solo, nil humoris aquae, nil molle aëri, nil inquam, quatuor elementis debent, proinde in ea dissolvi nequeunt. Qui vero Philosophi simile quidpiam Spiritui, quamvis in infimo gradu, cum D. Bernardo brutis etiam attribuunt, asserunt simul melius, magisque immortalitatem animae humanae evinci à Creatoris voluntate, qui hominum spiritus ratione, voluntate, libertate merendi, vel demerendi donavit, proinde ad consequendam mercedem operum in futura vita eos conservat: animabus vero brutorum ratione et libertate carentibus, etiamsi forte spiritus quidquam essent, conservationem denegat, easque in nihilum redigit.

Infecit Uxor, in furorem  
Carminibusque dedit malignis (1),

Ignava nam quid materies tenet?  
An est futuri prospiciens? memor  
Lapsi? sciens praesentis? utrum  
Cogitat? et bene cogitantem

Se noscit? utrum conscia sit sui?  
Novitne, quae se de nihilo, manus  
Expressit? an se se ipsa versat  
Liberè in hanc, aliamve partem?

An ejus insunt forte atomis vaga  
Scientiarum semina, et artium?  
Finesne? discrimenue callet  
Illiciti, licitique moris?

Fortasse sunt? quae noli? aut velit?  
Quae judicet? quae materia ordinet?  
Se forte res educat, ipsa  
Insipiens, sapientiores?

Sit spissa moles, sit vel liquens? caret  
His omnibus. Si viribus ingeni (2)  
Quod praestet, effingas? id ulli,  
Nectibimet tamen ipse credas.

---

(1) *Lucretius Epicureus, qui herbis veneficiis ab uxore praebitis in furias actus mortem appetuit, animam è materia tali modo disposita educit.*

(2) *Nec fingi quidem, aut credi potest, quod materia praestat intellectu, et ingenio.*

Jam quod suamet non habet in penu,  
Qui det? (1) Nec ergo fortuito venit,  
Nec inde: sed coeleste prorsus,  
Mens, Ratioque, Animusque donum est.

Exhausit illum pectore proprio,  
Venasque in omnes ore Diespiter (2)  
Spiravit admoto: lutumque  
Luculuit meliore flamma,

Quam raptus ignis solis ab orbibus,  
Per fabulosi furta Promothei.  
Est spiritus sacer; Deique  
Halitus est, et imago nullis

Delenda saeculis. Hujus originis  
Superba (3) dono temnat inutiles  
Metus tenebrosae, brevisque  
Sandapilae, neque fata tristis

Incuset, arctis limitibus Deos  
Clausisse vitae tempora, patrio  
Mens nata Coelo, perpes aevi  
Lumen, innocuosque soles

Visura semper. *Spiritus ad DEUM,*  
*Qui fecit illum,* quippe redibit, et  
Torrens, in immensique gutta  
Oceani remeabit altum.

---

(1) *Nemo dat, quod non habet.*

(2) *Diespiter, Jupiter diei Pater.*

(3) *Hujus originis dono superba mens humana, contemnat, necesse est mortem, nec de vitae brevitate, Deos incuset etc. Sandapila, feretrum, seu tumba cadaveris.*

Sic unde sumpsit principium dia  
Meus, semper illuc quaeret et exitum:  
Ni cymba nobiscum Charontis (1)  
Lucidat in stygiis paludes.

Sed haecne parvae conveniant lyrae?  
Quo Musa? Quercus (2) o Druidum sacras,  
Mentesque sublimes, Vegreae  
Concilium vetus omne ripae

Excellis altâ qui sapientiâ,  
Durande, quo nec porticus (3) ulla, nec  
Frequens (4) Academus, nec olim  
A Samio (5) Duce Secta nota,

---

(1) *Nisi nos ipsimet in stygem praecipitemus  
deflectendo ab ultimo fine.*

(2) *Ad ripas Vegreae ubi nunc vicus est de  
Roboribus [Roveros] quernum nemo in-  
colebant, ibique coetus suos agebant Dru-  
idae Philosophi Galli. O! Durande, qui  
altâ sapientiâ excedis sacras Druidum  
quercus, et mentes, ac concilium Philoso-  
phorum ad ripas Vegreae celebrari so-  
litum.*

(3) *Stoicorum.*

(4) *Academus Fundator loci Academia dicti.  
In hujus inferiore Gymnasio quod propriè  
Academia dicebatur, Plato Philosophiam  
magnâ discipulorum frequentia professus  
est. In superiori autem Gymnasio, quod  
Lyceum vocabatur, Aristoteles suos in  
Philosophia instituit sectatores.*

(5) *à Pythagora.*

Praestantiorum Philosophum audiit,  
Ne carmen audax temne: severa Te  
Decent, sed et Musis amico,  
Vena Tibi (1) Venusina ridet.

---

## O D E X V.

*Juvenilis aetas perbrevis.*

**T**riste lugebit senium Juventus,  
Laeta quae vixit nimium: sequuta,  
Quâ praecit caecus puer, et phœtrâ:  
Notus et arcu (2);

Tota cui aestas hyemi parandis  
Frugibus solers, cui mite ver, et  
Udus Autumnus salit otiosae  
More cicadae.

Praerit pulchrae breve ver Juventae;  
Flos et aetatis propere caducus.  
Imminet, rugis, tremuloque bruna  
Hispida vultu.

---

(1) *Vena Horatiana. Venusium in Apulia Pa-  
tria Horatii.*

(2) *Cupido. Juventus quae sequuta est cupi-  
dinem lugebit.*

Serpit, lieu intus, tacitèque rodit  
Ossa gliscentis caries senectæ.  
Vosne formosos? Juvenesque semper  
Esse licebit?

Qui (1) rotas Phaebi rapiunt, iidem  
Non reversuros, Pyrois et Æthon,  
Avehunt annos, procul ultimoque  
Æquore mergunt.

---

(1) *Pyrois, et Æthon equi Solis, qui rapiunt  
currum solis, rapiunt et annos non rever-  
suros, eosque videntur in aequore mer-  
gere.*

---

---

## O D E XVI.

A D

JOANNEM BORCH,  
PALATINUM LIVONIAE,

CUM STABILIENDÆ REINUMARIÆ TOTUS INCUMBERET.

---

*Opus est benefacere invitæ multitudini.*

**O**lim temporibus qui melioribus  
Nasci dignus eras, o Reipublicæ  
Tam praeclare Senator!  
Quam nil Philosopho minor:

Summarum nisi res est ea mentium,  
Totum se Patriæ tradere commodis:  
At qui, sponte perire  
Quales Andabatae (1) ruunt

---

(1) *Andabatae Gladiatores clausis velamine o-  
culis pugnare soliti. Qui sponte perire, seu  
ut pereant, ruunt, quales erant Andabatae.*

Praeter fata, furor quos rapit in suam  
Coecus perniciem, rejicientibus,  
Exosisque salutem,  
In praeceps et euntibus,

Dextram tendere, opem ferre piam, bonis  
Hoc par est Superis, Disque simillimum?  
Virtus non hominum haec est:  
Saltem semideos decet.

Vecors, non hodie scilicet, optima  
Fastidit populus, pars, male credulus;  
Pars, obtusus, et asper,  
Pars versatilis, et levis;

Mutari facilis: sed sapientiae  
Jussis, qui indocilis flectere se neget:  
Densas ocyus Orphœi (1)  
Sylvas ut lyra moverit,

Et rupes (2) Salios civerit ad modos.  
Felix esse quidem discupit, (3) esse sed  
Felix nescit: et aestu  
Ferventis pelagi minus

Tranquillus fremit, ac motibus omnia  
Incertis agitat. Sed cui? quam Tibi est

---

(1) *Ut Orphœo facilius fuerit silvas; et rupes  
lyrà, et cantu movere, quam ut hi indo-  
ciles homines insecti possint ad jussa et  
leges sapientiae.*

(2) *Salios ad modos. id est: ad choreas. Salii  
Sacerdotes Martis apud Romanos, saltan-  
do cultum Dii exhibere soliti*

(3) *Populus.*

Vulgi nota vel undis  
Inconstantior indoles?

Calliet nemo, hominum Te melius genus.  
Ast cordi Tibi sors illius, et bonum est.  
Urgens (1) passibus aequis  
Semper Cynthia Cynthium,

Desudare diu, nocteque Te vident,  
Testes, quidquid agis Civibus utile.  
Jam doctè meditatus  
Patrum Curia res stupet,

Ac cum Rege probat: quid populus? strepit!  
Et pro more suo garrir ineptus: at  
Donis et benefactis  
Invitus fruitur Tuis.

In pulchro properum trami te gloriae  
Nil te sistit, at est sat Tibi, publica  
De Re, Te meruisse:  
Totus gnavus et anxius

Firmes ut Patrias consilii opes,  
Praeventis (2) monitis damna salubribus.  
Ranarum (3) utque retardat  
Phaeben, vociferatio,

---

(1) *Cynthia Luna, Cynthius Sol, à monte Cynthio nomen habent. Luna, quae semper Solem urget, ih est: consequitur passibus aequis, seu aequalibus, Luna et Sol Te vident diu, noctuque.*

(2) *Praeventis, id est praevenis damna.*

(3) *Utque ranarum vociferatio Phaeben (Lu-*

Sic plebeius et clamor, ab orbita  
Recti, Te revocat. Legitimum Tui,  
Seram posteritatem,  
Noscis non nisi iudicem:

---

*nam) non retardat, sic nec Te plebeius  
clamor ab orbita recti avocat.*

---

---

O D E VII.  
SUB INITIUM INTERREGNI ANNO  
1764 DECANTATA.

EX ILLO SALOMONIS:

*Da mihi Domine sedium tuarum Assisticem  
sapientiam, etc.*

SAPIENTIAE 9.

DEINDE

STANISLAO AUGUSTO,

REGI POLONIE, MAGNO DUCI LITHUANIE, &c. &c. &c.

DEDICATA.

---

*De Sapiente Rege.*

**S**i quod profanis (1) est vetitum, licet  
Audire Vates: Sarmatiae novum

---

(1) *Ut profana olim antiquitas putabat ad-  
missos fuisse Vates ad arcana Deorum my-  
steria: sic Poëta hac ode fingit se inter-  
fuisse Consilio Deorum, seque audisse ab  
Iove Deos consultos de Electione futuri  
Regis Poloniae; ejusque sermonem exce-  
pisse.*

Regem daturus, sic Deos est,  
Sic Superum Pater allocutus,

Me teste: Se quod ritè colentibus,  
Bonisque, Reges dat Populis honos,  
Probos, pios, fortes, teraces  
Iustitiae. *Sapientiamque*

Locat beati ponè latus Throni;  
Quae dictet aptas, seligat optimas.  
Et pacis, et belli, secundis  
Temporibus, dubiisque, Leges.

Haec (1) scepra, sacra versat ubi manu,  
Sancto Senatus Concilio, Patres  
Conscribit angustos: ad omne,  
[E populo meliore quovis

Lecto) recenset munus idoneos.  
Addit bonis calcaria, praemiis.  
Cietque (2) tardantem mereri,  
Utilium celebrata latè

Merces laborum. Perdita spes malis.  
Fortuna Cives deserit improbos.  
Virtutis almae cuncta parent  
Imperio. Patrios honores,

Non illa Avorum, sed meritis jubet  
Gnavam Juventam quaerere propriis.

---

(1) *Sapientia.*

(2) *Eum, qui tardat benè mereri de Patria,  
merces à Principe pro laboribus utilibus  
aliis collata, omnibusque nota, excitat.*

Greges adulantum, paratas  
Venum animas, facilesque vendi,

Sublimis arceet limine Regiae:  
Faeces et omnes flagitio eripit.  
Intaminatis ipsa praestet  
Judiciis, nec in innocentem

Jus dat potenti. Si facilis tamen,  
Si prompta culpaè parcere supplici:  
At crimen exertat proturvum  
Terret, et insequitur securi.

Hinc triste (1) septis qualis olentibus  
Lupus, canum qui territus agmine,  
Arrexit horrentes capillos,  
Perpetuaque fugà relictis

Erupit oris; sic miserabile,  
Sic omni inaudax et pavidum loco,  
Foroque, compitisque pulsum,  
Ac domibus, scelus exul errat.

Seris nec aurum, vecteque triplici  
Eget: nec Argi centum oculis thorus  
Pudicus. Effraenes sat ausus  
Poena vigil cohibet, nefasque.

Rectricis haec est vis sapientiae.  
Illius (2) ars est, nosse, quid in doles

---

(1) *Hinc qualis lupus triste septis olentibus:  
ita Virgilius: Triste lupus stabulis, id est:  
quò contristat stabula, et septa ovibus,  
caprisque olentia.*

(2) *Sapientiae Regiae ars est; noscere gen-*

Gentis, quid innatus reposcat  
Laudis amor? quid opum cupido?

Non usitatis inde modis agit, (1)  
Urgetque motu perpetuo, floreat  
Artes ut omnes: hicque acuto  
Ingenio, vel adusque priscis

Res irrepertas detegat, aut novam  
Lucem repertis addat; at hic manu  
Quam mente plus celer, stupendi  
Res operis, pretiique magni

Effingat; (empturo illicium potens)  
Desiderati sic opifex lucri  
Sit certus, ac isto perennes  
Fonte meent, remeentque nummi.

Primus regentis sed labor, ut parens  
Fecunda frugum, rura Ceres colat;  
Tiphysque (2) quaesitas in omni  
Littore, velivolisque clausas

---

*tem proprium, qualis sit indolis. utrum  
amore laudis, an lucri cupiditate magis  
ducatur.*

(1) *Sapientia agit, et urget motu continuo, ut  
artes omnes efflorescant; utque hic, qui  
est acuto ingenio, vel non repertas adhuc  
res in scientiis, artibusque detegat, vel  
jam repertis novam lucem addat; at hic  
alius, qui celerior est manu, quam inge-  
nia, effingat opera stupenda, magnique  
pretii, et quae divites ad emendum alli-  
ciant etc.*

(2) *Tiphys Argonauta, qui artem gubernan-  
darum navium primus edocuit.*

Merces carinis, invelat urbibus.  
Gaudetque, privatam si opulentiam  
Industriae debet, suasque  
Quesque opera studiosiore

Res semper urget, navus et impiger.  
Re singulorum crescere publicam,  
Cum nôrit, et commune magnum  
Censibus exiguis parari.

Nec negligit, quas celat humus sinu  
Gazas avaro: viscera montium  
Ferro secat, nigris et infert  
Damna (1) Pluti, Triviaeque Regnis,

Venas ut addat divitiis novas.  
Tranquilla tutas sed teneant opes  
Ut regna, tutelâ potenti, et  
Viribus hic opus est, et armis.

Haec Rex futuri prospiciens, parat,  
Ne consili expers, quid trepidis agat  
In rebus, incensâ sequatur  
Dardanidem, Aeneadasque Trojâ (2);

Recensve miles, ne rudis agminum,  
Flammaeque, Martis turbet opus grave;  
Constat, repentinis deesse  
Et subitis animum, modumque,

---

(1) *Plutus, et Trivia, seu Luna, apud Poetas,  
Reges sunt subterranei.*

(2) *Ne fugiat è propria Regia, uti Aeneas, et  
Dardanidae, seu Trojani, ex incensâ fu-  
gerunt Trojâ.*

In imparatos si celeri pede  
Hostis vel impar ingruit. Otia  
Rex nescit, eventura prudens  
Providet, et meditatur alta

In pace bellum: vel socialibus  
Paci suorum foederibus cavet,  
Vectes ut aeternos ahenis  
Det foribus, reseret nec unquam

Templum Bifrontis (1). Lactus, amabilem  
Suo quietem si populo eximit  
Externa nec vis, Civium nec  
Jurgia, pestiferaeque rixae;

Sed grata, somno si placido levat  
Fessos aratro cum Dominis boves,  
Nutantis, annosaeque quercus  
Umbra, soporiferaeque ripae (2),

In publicorum tunc operum novas  
Molitiones, pronus et integer  
Incumbit, ac Divos superbis  
Indigetes habitare templis

Jubet. Tener vel tunc inopum Pater,  
Inferit asylis pauperiem piis;  
Doctas Juventuti Palaestras,  
Et mutilis, senioque fractis,

---

(1) *Bifrontis Jani templum pace semper clausum, bello reserabatur.*

(2) *Ordo Gramm: Si umbra quercus, et ripae soporiferae levant placido somno fessos aratro boves cum Dominis.*

Attrita quorum casside tempora,  
Tunc Martiales aedificat Domos.  
Tunc impedituras, feroci  
Hosti aditum per aperta Regni,

Communit arces: barbarus unde Dux (1)  
Noluit trecentis fulminibus quati:  
Tunc pontium moles, simulque  
Claustra vagis sinuosa rivis (2)

Ponit. Viarum dulcius Appia (3),  
Saxoque stratum planat iter. Fora,  
Nec arte dimensas plateas  
Innovat, et meliore donat

Forma. Vetustae moenia Regiae  
Corinthiis, aut Jonis modis  
Exornat, ac in plebis usum,  
Deliciasque profusus, hortos

Ludis aquosis instruit. In bonum  
Commune, semper splendidus omnium  
Provisor, ast illiberalis  
Et sibimet nisi parcus ipsi.

Nil Regiae deest magnificentiae;  
Ast hac in ipsa, nil nimium. Pari  
Metitur ac aequa bilance,  
Qui veniunt, abeuntque census;

---

(1) *Communit arces, quas Dux aliquis barbarus noluit, et metuat oppugnare, ne plurius tormentis inde quatiatur.*

(2) *Repagula [Tamy, Sluzy] in fluviiis.*

(3) *Appia celeberrima viarum, Romae Brundisium duceus, ab Appio Claudio Coeco, saepe quadrato strata.*

Modumque cautus servat, ut exitus  
Venas opum ne praesuperet, neque  
Pars maior absumatur Aulæ (1)  
Soriculus. Nihil esse novit

Egente pejus Principe. Proprii  
Proin videri vult patrimonii  
Attentus argutusque custos:  
Sollicitus magis anxiusque,

Non rem tributis angeat ut suam,  
Sed ut Paterna demat onus manu,  
Solventis è parvo, coloni,  
Et tenuem sibi vix agello (2)

Praebente vitam. Quippe bonus Prens,  
[Ut est Prens, Rex officii memor]  
Ceuliberos, et dulcis instar  
Prolis amat populum, suosque

Cives, et unam respicit ut Domum,  
Quâcunque spectat Regnum habitabile:  
Partitus, aequo jure natis,  
Lance pari sua dona, nec plus

Felicio, de Patria Virò  
Sed plus merenti: vel prohibitas diu  
Quem rara secrevit latentem,  
Et tacitum, medioque vulgi

(1) *Pescennius Imperator inutiles Aulicos sorices appellare solebat.*

(2) *Bonus Princeps non auget, sed demit onera colonorum, qui è parvo agello, et solvere, et tenuem vitam sibi parare debent.*

Exemit, aptum grandibus, et rei  
Natum gerendae. Novit enim suos  
Princ.: s: huic horas diurnas  
Dat studio, vigilesque noctes:

Se seque totum sedulus usui, et  
Unum saluti devovet omnium.  
Nascantur è quo fonte, gnarus,  
Regia jura; datasque nusquam

Fuisse gentes Regibus, at datos  
Fuisse Reges Gentibus; haud sua  
Se seque libertate frustra  
Trux hominum genus exuisse;

Non ut Tyrannos, [sunt miserae quibus  
Turbæ gementum, grataque servitus]:  
Sed ut pios, justosque Patres  
Deligeret, memoresque se se

Certis teneri Legibus. His nisi  
Subesse Reges se quoque sentiant,  
Non temperatam vim, tumultus,  
Seditioque nocens sequetur.

Odère semper, qui metuunt. Metu  
Custode tutum nil bene. Vidimus,  
Si non amor fulcit, fidesque,  
Saepe throas titubare celsos.

Hoc non timebit Rex Sapiens, cui  
Potens in omnes jus animos dabit,  
Coelustus et callens regendi  
Ars homines. Cui sunt benigna,

Quae rite puris et manibus colit,  
Supplexque placat Numina: Regios

Mores et exemplum sequente,  
Ac studiis imitante magnis

Turba sui vestigia Principis.

Sic una mens est cum populo Duci,

Ut vera sectentur, Deoque

Digna, superstitionosa temnant.

Nōrintque coelo sidereum Patrem

Praeesse justum, qui Dominus, (1) male

Oblivosos, impiosque

Cuspide saepe monet tremenda;

Quid possit? et quid juris in infimum

Telluris Orbem, Regnaque maxima

Sibi reservarit, Coronas

Ad lubitum arbitriumque mutans.

Jam major, aut quae faustior accidit

Felicibus sors Imperiis? ubi

Cantare non fastidiosis

Regibus haec, cupidisque veri

Fas est. In Aulis stat male veritas:

At Rex Magistro Discipulus Jove

Qui regnat, huic primas in omni

Consilio dat, et aure prona

Audit monentem: sic male noxio

Errore liber, fraudibus, et dolo est,

---

(1) *Jupiter, qui cuspide tremenda fulminum coelo saepe demissorum movet impios, sua infinita potentia Orbem regi; quod et Horatius agnovit: Coelo tonantem credidimus Iovem:*

Sic hostis est nulli, protervum  
Quem Patriae nisi nōrit hostem:

Sic Patriae quō quisquis amicio,

Is certus idem, Regis Hephaestion (1)

Sic cara Majestas supernis

Disque placet, populis et imis

Aequè: Polonis addite Regibus

Regem faventes o Superi! optimum

Quem nōstris, aut huensque qualem

Vaticinae cecinere Musae (2).

Sic pax beatos alma feret dies:

Sic prosperorum Civibus omnium

Spes omnis, et fortuna crescet:

Perque libros, per et ora saeculis

Narrata seris, gloria nominis,

Et laus, et ingens Imperii decus

Clarescet, audietque, toto

Gentibus Oceano revulsis (3).

---

(1) *Hephaestion in maximis favoribus fuit apud Alexandrum Macedonem.*

(2) *Longior quidem justo haec Ode est, sed longitudinem ejus materiae copia, et magnitudo excusat. Complexa est, omnia ferre Principis officia; nihil in ea intactum reliquisse videtur, adeo, ut quasi quoddam compendium sanioris Politices, et consilii accipi possit.*

(3) *Ultramaris, et Oceanum habitantibus.*

---

## O D E XVIII.

### IN ANNIVERSARIO DIE ELECTIONIS STANISLAI AUGUSTI,

REGIS POLONIE, MAGNI DUCIS LITHVANIE.

*De vaticiniis Gentis Polonae cum in Campo  
ad Volam Regem eligeret.*

**A**d Volam situs, atque comparandus  
Eleo bene, Martioque, campis (1),  
Tectus Nobilitate purpurata,  
Bissenos retro, *Campus*, ante Menses,  
Cum fervens, animisque, vocibusque  
Te concordibus ad Thronum vocaret,  
Quantis ominibus, bonisque fatis,  
Quantis auguriis, amoribusque,  
Auditus mihi personare totus!

(1) *Wola, pagus ad Varsaviam, cujus campi Electionibus Regum sacri. Eleus campus ad urbem Elidem in Peloponneso, consuetu totius Graeciae ad ludos Olympicos, celeberrimus. Martius campus, locus Comitiorum Romanorum.*

Praedicit populus lubens, quod optat.  
Et de Principis mamma sperat. Aevum  
Ac Saturnia jam redire Regna,  
Pars est vaticinata. Pars ab aethra  
Astreae reduci, foro remotas  
Venales animas, locum daturas.  
Pars Numen placidum, piosque nobis  
Divos affore pollicetur, Aulâ  
Pulsis impietate, trossulisque (1).  
Pars, è semine fortium Virorum  
Quod natura Viros, paresque priscis  
Heroas dabit: hinc vigebit Almae  
Pacis consiliis gravis Senatus,  
Et belli studiis calens juvena,

Pagis, et Ceres, Urbibusque Tiphys,  
Omnes divitias ferent, opesque.  
Fundent Sarmatici metalla montes.  
Nec lucentia Seribus (2) vel Indis,  
Nobis fas erit invidere fila,  
Lanarumque nives Ibericarum (3),  
Silvae lanificos dabunt Polonae

- (1) *Trossuli: Cohors Equitum apud Romanos, qui sub Romulo Celeres, et postea Flexumines appellati fuerant, Trossuli dicti, quod Trossulum oppidum Etruriae sine peditibus expugnassent. Sed cum sensim in effeminatos, lascivosque degenerarint, vox illa trossuli dici coepit contemptim de iis, qui cultui nimio corporis studerent; hinc lingua nostra Patria Trossuli, [Trensiæ].*
- (2) *Seres populi Scythiae Asiaticae, è quorum regione fila serica copiosius prodierunt.*
- (3) *Hispanarum, Baeticarum.*

Vermes, vellere prata nostra, nulli  
Cedent Hesperiae (1), nec Albioni.

Aetas artibus ulla percolendis,  
Aut plus ingeniis amica, nusquam,  
Quam sub tam Sapiente Rege, nobis  
Affulgebit. Opes, decus, salutem,  
Fruges, otia tuta, gloriamque,  
Hoc sub Principe fas sit ominari.

Haec praesagia, quaeque laeta de Te  
Fuderunt simul hoc die Quirites (2),  
Felix, omina, vota, spes adimple!  
Imo spes supera omnium! Tuaeque  
Sis Gentis Pater, optimusque Regum.  
Nil istis puto majus esse votis,  
Nullum Di quoque majus audire,

---

(1) *Hesperiae, seu Hispaniae, Albioni, Angli-  
ae, seu M. Britanniae.*

(2) *Quirites pro Nobilitate Polona. Quirites  
vero Romani dicti à Romulo Quirino, seu  
ab ejus, quam portare solebat, Canna,  
[Trzcina] quae Sabino sermone vocabatur  
Quiris.*

---

---

O D E XIX.  
IN ANNIVERSARIIS SACRIS  
CORONATI REGIS

AD DIVOS REGNI INDIGETES.

1765.

---

**Q**uibus Regis, Patriaeque, res sunt  
Desuper curae, Superi benigni:  
Supplici, mites, placidas et aures,  
Flectite voto!

Hic dies pleno redivit almus anno,  
Sacra lux magnae Populi saluti,  
Liberis certum melioris omen  
Gentibus aevi.

Primus hic celsae diadema fronti  
Optimi Regum, Patriaeque Patris  
Cinxit, et Regno nova fluctuanti  
Fata reclusit.

Quanta bissemi peperere menses!  
Pulchra Libertas, animamque Leges,  
Et Themis sedem penitus relictam,  
Tuta recepit.

Consili sanctus vigor, et Senatûs  
Tempta jam dudum redière jura.  
Spes alit, bellax avidusque priscae  
Sarmata famae.

Mirus incessit calor et Juventam  
Gloriae Patrum satis invidentem.  
Quid boni non dent et opes, et artes,  
Crescere jussae?

Prosperent haec Di bene coepta! Multo  
Thure fumantes adolemus Aras,  
Imperi sortes ut eant secundae  
Sospite Rege.

---

O D E XX.

A D

PAULUM THADÆUM

CZAPSKI,

GENERALEM PRÆFECTUM EXCUBIARUM.

---

*De desideriis hominum coërcendis.*

**B**eatus ille, qui cupit nihil nimis,  
Votis et imponit modum.  
Qui mox recedit, à quibus, recta ratio,  
Desideratis, dissidet.  
Libens obedit et Deo, Deique vice,  
Quidquid animus rex imperat  
Cui impotentes pectoris fluctus domat,  
Tridente (1) quasi mens arbitra.  
Non plus et ultra (2) noxiis cupidinibus,  
Metamque praefigit brevem.  
Cui vultus idem fortunae utrique obvius,  
Utrâque non mutabilis.

---

(1) *Tridente; Neptunus sceptrum trium denti-  
um gerit, maribusque apud Poetas imperat*

(2) *Non plus ultra Herculeum, cuius notum.*

Ast haec facilia Musis sunt cantu meis,  
 Dictuque prompta Stoicis (1)  
 Quorum, Socratica mentis immotae quies,  
 Tot intumescit laudibus.  
 Verum haec quieta sapientis malacia (2),  
 Imago pacati maris,  
 Occultiore nec aestu libidinum,  
 Nec Æolis diris caret.  
 Nam parvus Oceanus homo est, frui diu  
 Nec pace secura potest.  
 Rerum quaternae bella dum causae gerent (3),  
 Ignique pugnabunt aquae,  
 Saevis edusque et cor cupiditatus,  
 Dolor, voluptas, impetent.  
 Ridenda Cythii vanitas Philosophi (4),  
 Nil sentientum Principis.  
 Nonnullus ex his, disputator publicus,  
 Docuit Zenonium Virum  
 Nunquam esse biliosum, irā nec corripī,  
 Unquam nec excandescere.  
 Haec cum doceret, octies ex canduit:  
 Naso sed alter mox vafro (5):

- 
- (1) *Stoici docebant sapientem immotae penitus esse mentis, nullo motu animi laborare, qua laude Socratem prae caeteris celebrabant.*  
 (2) *Malacia est quies summa maris; quae semper est periculosa.*  
 (3) *Quatuor elementa.*  
 (4) *Zeno Princeps nil sentientium Philosophorum, seu qui se jactabant, nullo animi impetu contra rationem moveri, dictus Cythius ab Urbe Cypri Cythio, Patria sua.*  
 (5) *Naso vafro, naso acuto, homines astuti intelliguntur.*

*Iratus, inquis, sapiens non irascitur.*  
 Dirempta, lis risu fuit;  
 Nec esse statuam (1) qui vis sapientem, sua  
 Decrevit è sententia.  
 Irascimur itaque, cupimus, et horrescimus,  
 Desideramus plurima!  
 Virtutis atqui rationisque est, ponere  
 Stultè cupitis obicem:  
 Pravis reniti motibus, semper malo  
 Certare, semper vincere:  
 Nam sacra pugnae est vita praesens, est alia;  
 Sertis, triumphis, otio.  
 Haec veriora, ridiculis Regum aemulis (2),  
 Zenonis Auditoribus.  
 Tu qui Academo, quidquid est sublimius,  
 Quidquid Lycaeo, et porticu,  
 Secernis, et quae saniora deligis  
 Annis Samii silentibus (3);  
 Qui Christianā temperas sapientia  
 Altos Sophorum spiritus,  
 Profunda cujus mentis inivi saepius  
 Lutetiae, et Fonte candido (4),

- 
- (1) *Nec esse sapientem immobilem, ut statuam.*  
 (2) *Stoici sapientem uno Jove minorem, et Regem Regum nominabant, quos irridet Horatius: Ad summam sapiens uno minor est Iove, Liber honoratus, pulcher, Rex denique Regum, Praecipue sanus, nisi cum pituita molesta est.*  
 (3) *Pythagoras Samius quinque annis Auditores suos penitus silere jubebat.*  
 (4) *Lutetiae, Parisiis; Fonte candido, Biaty-*  
 8\*\*

Es certus arbiter, Philosophia an Tua  
Meos iambos influat.

---

## O D E XXI.

*De cupiditate opum moderanda.*

**F**elix, opes qui spectat ita, pellucas  
Spumas ut Eoi maris (1).  
Candente rutilas linleo ripas tegunt (2),  
Brevesque disparent nives:  
Perire celeres, sic et divitias [monet  
Ut Stoa] qui considerat,  
Illis minus jam fidet, ac cristallino  
Fragilique ponti Vistulae.  
O non ad istas hominis ingens spiritus  
Nugas ab alto lapsus est!  
Carcere vel illum clausuris adamantino,  
Sursum inquietus emicat.  
Felicitatum cupidus at perennium,  
Contemptor apparentium!

---

stok, magnificentissimum Palatium Ducis  
Branicki.

- (1) *Eoi maris, seu Orientalis, ab Aurora, quae  
Graecè Eos dicitur.*  
(2) *Maria cum in planiores ripas effluunt, lin-  
tei instar albi, candida spumâ eas con-  
teguni.*

Proinde pueris linquitote, quod nitet,  
Ardetque fulvum et flammeum.  
Quae deseruntur, invitosve deserunt,  
Merentur an dici bona?  
Jam dives ergo si quibus favet Plutus,  
Utantur ejus munere.  
At non suarum mancipia sint tamen opum,  
Vilesque nummum servuli.  
Arcae redundant aureis, et gemmeis,  
Gazis utriusque Indiae;  
At cor utrasque tenat altioribus  
Immune servatum bonis.  
Haec, si recorder, hisque si tecum immerer,  
Casus ad omnes riserunt,  
Nam si sinistra rapiat, dextra levis  
Fortuna quod dedit manu,  
Rapiat! mihi [dicam] prorsus ademit nihil,  
Detrahit è meo nihil:  
Irascar an fors ideo, quod superflua  
Dempsit pilis, et unguibus?  
Dives, superfluum non cui opes, sed is,  
Qui scit, frui parvo bene

---

## O D E XXII.

*De ambitione fraenanda.*

**S**ors invidenda! quorum intus mens Regia,  
Humana ridet culmina;  
Raroque fastu ceteris mortalibus,  
Ut se minima, despicit,

Quae summa rerum credulum vulgus putat,  
 Curvoque adorat poplite,  
 Serenitates, atque Celsitudines,  
 Rubras et Eminentias,  
 Ut quasque sanctum jus, et fas decens jubent,  
 Colit, sed haud ulli invidet.  
 Quin et fatuitatem nimis ambientium  
 Fasces, Curules, Purpuras,  
 Explodit aut cachinnis cum Democrito,  
 Complorat aut Heraclito.  
 Nam mors, videbantur qui prorsus impares,  
 Ostendit omnino pares.  
 Probat id colubri audax, dum et Regum illiis  
 Non parcat, insolentia (1):  
 Cinisque putris, dignosci plebeió  
 Qui non potest à pulvere.  
 Immensa casulas à Throni fastigio  
 Secernit hic distantia:  
 Miscentur illic, aequanturque, dum gravis,  
 Utrique tellus incubat,  
 Aequalitatem hanc, mundi Civis intuens,  
 Mistos et imis apices,  
 Mirabitur nil, praeter diam mentem hominis;  
 Humana temnet cetera.

(1) *Audax colubri insolentia, qui nascitur in illiis seu visceribus Regum, aequè ac in pauperum cadaveribus; probat Reges quoque pares esse ceteris mortalibus.*

## O D E XXIII.

### AD ME IPSUM.

#### *Devitae brevitate.*

**H**eu quid vel Priamo (1), vel Pylio (2) Seni  
 Prudens invidiam? quem fere saeculis,  
 Praestolata tribus cymba (3) Charontis est,  
 Ad ripas Acheruntias.

Lethi, seu cita, seu tarda necessitas,  
 Immutabilis est. Ergo statam mihi  
 Ad metam, reliquum quid superest viae?  
 Nil me sollicitum tenet.

Sexaginta hyemes vidimus (4): an prece,  
 Et thure, et lacrimis cogere fas Deos?  
 Nobis plus, minus, ut solstitiis (5) adhuc  
 Denis tempora prorogent?

(1) *Trojanorum Regi valde annoso.*  
 (2) *Nestor trecentorum annorum senex, à Pylio oppido in quo natus, dictus Pylius.*  
 (3) *Nota cymba, seu navis Charontis, qua animae per Stygias et Acherontis undas post mortem transvehi dicuntur.*  
 (4) *1760 Anno.*  
 (5) *Dena solstitia, nimirum quinque hyemalia, et aestiva totidem, annos quinque denotant.*

Quin id si faciant, et totidem hesperos (1)  
 Addant praeteritis? dura tamen, mori,  
 Ad tristesque Erebi, serius, ocycus  
 Umbras currere, Lex jubet.

Vitam proinde rosae vivat hic, Atropos (2)  
 Nutricis tenerae quem rapuit sinu:  
 Octoginta alius spectet ab humido  
 Soles retrogrados capro:

Hic quercus (3) superet vel senium sacrae, et  
 Tercentas segetes invehat horreis:  
 Hic certet Libycis vitā Elephantibus,  
 Cornicique superstite,

Tantundem est, stygiam ripam (4) adeuntibus.  
 Tardet, seu properet Parca, quid est? duas  
 Horas? aut duo qui saecula vixerit?  
 Clausus sarcophago est civis.

(1) *Id est: ut addant tot dies, quot jam praeterierunt. Hesperus stella, quae, cum mane solem praecedat, Lucifer appellatur; cum vero vesperi subsequitur, Hesperus vocatur.*

(2) *Atropos, mors.*

(3) *Quercus tribus saeculis stare dicuntur; Elephantes totidem vivere, cornix item.*

(4) *Id est: qui ripam stygiam adeunt, seu qui moriuntur, tantundem illis est, vixisse vitam rosae, quantum vitam Elephantis, aut cornicis, cum et brevis, et longa vita praesens nihilo terminetur, in nihilum evanescat.*

Aetas an brevis, an longa? quid interest?  
 Longae finis, idem est, si nihilum, ac brevis?  
 Quod nuper, vel heri praeteriit, fuit.  
 Jam non est: aut est nihil.

Punctum linea cum venit ad ultimum,  
 Quidquid retro jacet, deperiit. Neque  
 Ternum Nestora qui vixit, et occidit,  
 Plus vixit violae die (1).

Si jam mors, subito praetereuntibus (2),  
 Aequat cuncta, diu quae steterint, pari  
 Amorum interitu: nil moror, illico  
 Supremus celeret dies.

Hesterno o Superi jungite crastinum!  
 Brumae, quaeso, tepens addite ver adhuc!  
 Tantine est? ut ob hoc, Ara mihi frequens  
 Multis fumet odoribus?

Si fixum semel est, post genitis locum  
 Linquendum esse: silens et tacitus loco  
 Cedam, nec querar, an cras, hodieve? sim  
 Pulvis surdus et immemor!

Jam si [spes etenim certa] pie migrant  
 Ad sedes animae, queis face Cynthii

(1) *Quid est enim illud diu, cujus cum extremum venerit, totum quod praeteriit, pro nihilo reputatur; ita cogitavit et Cicero.*  
 (2) *Id est: mors dum omnia in nihilum redigit, id efficit, ut par et eorum, quae diu steterunt, et eorum, quae subito praeterierunt, interitus, omnia, quae sive diu, sive parum vixerunt, exaequet.*

Clara non opus est; si Libitina nos (1)  
Tantum dimidios petit,

Si post, pars populi non revocabilis  
In lucem, Elysiis addita Civibus,  
Si manes (2) erimus? squallida quid palus?  
Quid trux ad styga portitor?

Moestum quid nigra me carbasia terreat?  
Inclamem potius, littus in alterum,  
Aeternosque sinus, depositura me,  
Heus felix propera ratis!

- 
- (1) *Libitina, seu mors, corpus perimit, animae nihil nocet.*  
(2) *Manes, animae, quae post mortem corporis manent, et Civibus Elysiis, si bonae sunt, annumerantur.*
- 

## SERMO

DE VERA GLORIA.

### ARGUMENTUM.

*Poeta dat Juventuti verae gloriae notionem. Incipit vero ab Horatii Flacci Venusini exemplo, qui, dum Augustus de eo, joco quereretur, se ab eo sperni, quod suas epistolas et sermones aliis, non sibi scriberet, se se eleganti ad Augustum Epistola 11ma Lib. 2. excusavit: pudore se retrahi, ne parvum Carmen, et repentes per humum sermones Majestati obtrudat: sequi tamen vel eminus se Horatianos sermones velle, qui cum tempore emendari possint: praesertim nostri Augusti saeculo, sub quo spes sit, literas, et educationem Juvenum fore florentissimam, de cuius utilitate aliquid innuit; deinde laudis et gloriae cupiditatem Adolescentibus potissimum inspirandam esse: monendos tamen eos, in quo veram olim gloriam statuere illos oporteat; non in opibus certe, non in titulis, et potentia, non in pro-tendendo armis imperio, sed in bene merendo de Patria, praesertim vero in excolendis omnibus artibus, quae sint Civibus, ac populo per-utiles, beatamque reddant Rempubicam.*

---

**R**epere se Venusinus humi, neque Caesaris aure  
Promere dignum quid, Musa obluantate fatetur:

Arridet tamē Augusto, sermone solutae  
 Consimili linguae, cum Majestate locutus.  
 Carmina nos quoque non numeris, non arte polita;  
 Indeque praeceptis morum meliora, secuti,  
 Tentamus, premimusque Ducis vestigia Flacci  
 Loripedes (1). Conandum aliquid vel debile, donec  
 [Morē (2) Crotoniatis, sueti portare lacertis  
 A vitulo crescentis onus bovis] ad graviora  
 Artus firmentur. Nihilibet: anxia coeptis  
 Ars rudibus, limam semper dabit, et mala menda  
 Paulatim expunget, vitiiis ac oblita, nunc et  
 Pingua, deterget, polietque laborque, diesque.  
 Augusti et nobis redit aetas, Principe docto!  
 Pacato qui consiliis sapientibus Orbe,  
 Legibus ornata Patria, coetque peracto (3)

(1) *Loripes, qui pedes habet debiles, et instar lori flexibiles.*

(2) *Crotoniatae incolae Urbis Crotonae in Calabria sitae viribus excelluisse, et praestantissimi Athletae fuisse dicuntur. Ex horum numero Milo quidam tantae fortitudinis fuit, ut taurum in Olympico certamine pugno occiderit; eumque per stadii spatium, absque minima defatigatione, super humeros portaverit.*

(3) *Comitiis Coronationis Anno 1764. celebratis, haec decantata erant, tamque auspiciatae praedictiones biennio fere adimpleri coeperunt; multa saluberrima Reipublicae constituta, et coepita fuerunt. Sed fortuna versa, vique inopina sub finem Anni 1766. omnia fere subruta: optare, ac ornari licet, quum praesens procella praeterierit, meliora lapsis.*

Magnae Gentis, compositis bellicque, domique  
 Rebus, depulsis longe qui nubibus atris,  
 Sanguineam quae vix non deposuere procellam;  
 Sedato motu pelagi, civilibus armis  
 Ereptis, Jani ancipitis qui cardine clauso,  
 Ac Themidis templis, et apertis Arcopagis,  
 Tranquillo serum solio fruiturus in aevum,  
 Imperii curis istam potioribus addet,  
 Sarmata habere domi proprias ut possit Athenas,  
 Deficiat formandae ut nil ad magna Juventae,  
 Nec Latio (1), Druidum nec successoribus, olim  
 Spartanis quidquam neque legibus invidemus:  
 Gloria quo Patriae crescat; mirentur et aptos  
 Castra viros, Arae Mystas, et Curia Patres,  
 Quos nunc Palladiis spectamus ludere in ulnis.

Ast ut quid certi prima à lanugine (2) constet,  
 Expedit, à teneris quas sit traducta per artes  
 Aetas, in cunctas verti tunc prompta figuras.  
 Estque ratum, et constans, tales olim fore Cives  
 In Patria, sancta tales et in Aede Senatūs  
 Patres, primaevro quales in flore Juventae.  
 Hos Praceptorum prudens vigilantia finget,  
 Inque animos molles melioris semina vitae  
 Injiciet. Monita inter, causas inter honestas,  
 Illicio famae et landis, superanteque vulgus  
 Gloria, ad egregios, generoso et pectore dignos  
 Ductur ausus. pubes florentissima Regni  
 Praetextam (3) positura brevi, ferulàque relicta

(1) *Ne Italis, Gallis, et veteribus Spartanis Leges eorum de educatione praeclaras invidemus. Druidae, Mystae, et Philosophi veteres Galliae, successores eorum Galli.*

(2) *Lanugo, pili tenerrimi barbae et menti juvenilis.*

(3) *Praetexta, genus vestimenti oblongum apud*

Civium et ipsa sacros coetus auctura honorum.

Sanguinis est etenim alti gloria semper amica,  
Pervaditque animos, magnorum et corda Virorum,  
Nomen ut eximum praeponant vitae opibusque;  
Et potiora sibi quaevis dispendia ducant  
Rerum; quas primas cupiunt, virtute relicta,  
Serviles animae, lucrique cupidine captae. [nat

Nam quis in his inquam famamque, decusque repo-  
Summum, fluxis et perituris rebus? aut quis  
Fortunae prodesse putet nisi munera coecae?  
Ut nemo sit clarus, felix nemo, nisi idem  
Dives honoratus, multisque clientibus auctus?  
Fascibus, ac praeunte aurēam Lictore liburnam (1),  
Victrici aut lauru sua circum tempora cinctus?

Est breve, mortales, quidquid delectat, id unum  
Praeter, quantum quis Patriae bene praestitit, et se  
Exemit vulgō; magni qui nomine Civis  
Hoc sapiens bene scit, sed oberrat (2) saepe Juventus,

*Romanos, seu toga alba purpureo prae-  
texta limbo. Praetextam pueri gerebant ad  
annum aetatis decimum quintum, vel jux-  
ta alios decimum septimum. Tunc enim,  
adolescentiae jam annos ingressi, depo-  
nebant praetextam, et sumebant Togam  
puram, nullo scilicet purpureo praetextu  
distinctam.*

- (1) *Liburna, genus lecticae apud Veteres, in  
formam Liburnicae navis constructae in  
qua ditiores clausi, per Urbem veheban-  
tur. Usurpari potest pro omni exquisi-  
tiori vehiculo, seu rheda.*
- (2) *Sapiens scit summam gloriae consistere in  
bene merendo de Patria, sed juvenus er-  
rat, ignoratque in quo vera gloria sita*

Nescia quo sese populum super elevet, et rem  
Summam, nunc in opum statuit splendore superbo,  
Nunc ampullata serie locat in titulorum,  
Nunc tantum domito in captis ex hoste trophaeis,  
Sed nos velamen teneris demamus ocellis,  
Incerti sumant ne lucida pro pretiosis.

Divitiisne igitur tentetur gloria primum?  
At tibi sint, fuerint quae Crasso, quaeve Lucullo,  
Aut his majores, Croeso, vel Pygmalioni,  
Si nihil hinc Patriae (1), nisi quod gravioribus arcis  
Brachia nulla satis sint, quod frangantur aheni  
Vectes? ridendi populo praebebis avari  
Materiem, ad manesque macros inglorios ibis.  
Quis furor iste etenim? mentis quae insaniam? dum tot  
Artibus injastis legitur, celetur ut aurum?  
Nil intentatum, nil sanctum, nilque propinquum  
Auri sacra famae patitur, sopita revolvit  
Rursus jura, fidem nulli bene servat amico,  
Vicino juxta litem movet, atque remoto.  
Crescit res, avido crescit sub pectore flamma.  
Nil curo, modo sim dives, locuples, opulentus,  
Talem me norint cuncti, sic audiar Urbi.  
Talis eris, sed non melior, nec pluris apella (2)  
Judaeo, cujus fastum, et stratum solido auro  
Grande pavimentum calcavit, et amstela risit.

*sit: an in opibus, an in ambitiosis titulis,  
an in solis ex hoste trophaeis, qui Juve-  
num error, sequentibus oppugnatur: Di-  
vitiisne igitur, etc.*

- (1) *Id est: si divitiae non impenduntur in uti-  
litate Patriae, nullam gloriam afferunt.*
- (2) *Judaeus stratum aureis pavimentum Am-  
stelsdami habuisse narratur. Apella de-  
signat circumcissum, seu sine pelle:*

Quâ datâ portâ opibus lectis per fasque, nefasque,  
 Nil ignobilius, quin certa infamia merces.  
 Nil in res alienas usurpat sibi juris  
 Gloria vera, sed utilibus praeponit honesta.  
 Ergo congesti non ingens aeris acervus,  
 Mansurae faciet laetari munere famae  
 Quenquam, si friget studium prohibitatis, et aequi,  
 Omnis et in fulvo demersa est cura metallo.  
 Nomen ne quaeras frustra in praedivite censu,  
 Acterno quicumque voles splendescere honore.

Ad fasces juvat ergo recurrere, et ordine longo  
 Poscere transmissas ab avis, proavisque secures?  
 Scilicet officiis, amplis, titulisque, Clientum  
 Turba et amicorum poterit studiosa parari.  
 Fas erit in quavis primas tum ludere scena,  
 Et mediam Patriae damna inter, commoda et inter,  
 Lancem agitare: ultro quia parent cuncta potenti,  
 Et sibi nil vetitum ducit, nil inficiale.  
 Quid liceat? vel nulla, vel ultima quaestio, quippe  
 Illi est prorsus idem, omnia posse, ac cuncta licere.  
 O miserum! famam, qui in libertate nocendi,  
 Peccandique impunè, putat se posse locare.  
 Cui sit idem quidvis audere, ac esse potentem.  
 Gloria vera, sequi non vult hanc passibus aequis,  
 Sublimi venit, quaecunq; ab honore potestas,  
 Nî tota in Patriae, populorum et commoda cedat.  
 Vile Magistratus, Comes, et Dux, vile Senator,  
 Vile Palatinus, Princeps, et maximus Archon,  
 Grandia distendant si tantum nomina pompam,  
 Intus, quam claudit ventosa cucurbita, nil plus.  
 O ingens caput! at mutum, vel inane cerebro.  
 Quot gestant statuas, ipsae ridentque Curules!  
 Gloria nempe suis hos accensebit alumnis?

Trans Arabes etiam, extremos trans si quis et Indos  
 Proferat Imperii fines mucrone soluto,  
 Clarus erit saeculis at detestabilis idem.

Clarius ergo mihi meritoque illustrior ille,  
 Qui prudens<sup>(1)</sup> belli flammam, impavidusque perhor-  
 Et cui plus vita est Civis, quam gloria quaevis [ret;  
 Propria. Sed Patriam si barbarus assilit hostis,  
 Fortunae, capitis, sobolis, ruit in memor idem,  
 Ut Leo, per medias caedes, per tela, per ignes,  
 Conservatque suas defensus Civibus aras,  
 Tranquillosque Lares, cunctis tuta otia praestans:  
 Sed simul ut custos argutus, et undique cautus,  
 In subitos quosvis casus parat arma, manusque.  
 Securam populo sic asserit ille quietem,  
 Pacatusque suae Patriae Numa Civibus audit,  
 Legibus humanae tum res in pace revincit,  
 Effringitque hominum genus ad virtutis amussim.  
 Ingeniis insistit et artibus expoliendis,  
 Quae mentes acuunt, ac ad sublimia tollant;  
 Quae solidi<sup>(2)</sup> faciant ad veri cognitionem:  
 Quarum aliae pulsa, erasaque superstitione,  
 Numinibus normam, et sacris dent rite colendis  
 Atque probos mores inducant, et basin omnis

(1) Statuitur deinde vera gloria in eo, ut impavidus Princeps, sive Civis bellum quidem, quoad fieri potest, perhorreat, sed Patriam, cum ab hoste impetitur, generosè defendat. Pace vero restituta et in quosvis casus Patriam praemunitam, eandem legibus, bonis institutis, opibus, artibusque exornet.

(2) Leges primum, et artes introducendae sunt, quae faciant ad cognitionem veri, hoc est: Verae Religionis, ad rite colendum Deum pulsa superstitione, et ad justitiam administrandam, probosque mores inducendos. Aliae artes, quae populum occupent, lucrosaeque sint.

Juris, quod fieri tibi non vis, et mihi notis.  
Ast aliae impediunt, vitius ne dedita sit plebs,  
Torpida, pigritie ne diffluat, at malesuadam  
Indefessa famemque, sitimque industriae pellat.  
Fons ut opum primus, solers cultura sit agri,  
Urbicolis sacrosa ferant commercia nummos.  
Plebejae turbae, ditescendi hic modus esto,  
Hic labor, ars digitis (1) quidquid subtilibus audet.  
Sic modico sensim crescent aëria censu  
Patria, collectique et magni fluminis instar,  
Gaza velut parvis turgescet publica rivis.  
E populo jam quisque parum sibi demat, et addat  
Communes ad opes, ne pulvinaria (2) soli,  
Dignique invidia jactent Regalia Persae.  
Consilio, factoque suis qui talia praestat  
Civibus, et patrios vitam partitur in usus;  
Cui scopus est commune bonum, cui denique primae  
Est curae Respublica, felix atque beata  
Ut sit: huic debet se gloria jure perenni  
Invida non petet hunc inimico dente vetustas,  
Nec monumenta dies delebit, nec meritorum,  
Tempus edax testes tabulas, nec marmora laedet,  
Sed nomen potius gratum transmittet in aevum,  
Posteritasque memor tabulas, et marmora vincet.  
O Cives Cives! generoso pectora honesto  
Imbuti, Vobis quid non sub Principe tanto  
Moliri expediat, verae pro gloriae amore:  
Qui jam pene sui oblitus, propriaeque salutis  
Inmemor, in res emolumenta que Civica totus

- 
- (1) Quò subtilior ars quaecunque Mechanica,  
eò subtiliore digitorum opera eget.  
(2) Pulvinaria Regum Persiae vocabantur duae  
ingentes arcae auro platae, ad caput et  
pedes lecti locari solitae.

Imminet, antiquos instauraturus honores  
Gentis, et Europae lanci (1) momenta daturus.  
Ergo Pater Patriae, Regum, reor optime, saive  
Optatum decus Orbis Sarmatici, inclyta Magni  
Herois proles, (2) populo da jura fidei,  
Spes supera nostras, Piasique, et Nestoris aevum!

---

## SERMO DE VIRTUTE.

**O** haeres (3) et amor cordis, primumque totinter,  
Artificis sapientis, opus, pulcherrima Virtus!  
O desiderii hominum, quae meta scopusque es:  
In cujus, speculi puri instar, imagine, se se,  
Coelestes spectant animae, videt et Deus ipse.  
O exul terris nec egens potiusque, cibique,  
Ex temetque, sine aede, opibus sine dives et auro.  
Non adversa humilem, non te videre superbam  
Prospera: sublimis semper Regina, potenti  
Seu sceptro, seu stivae (4) innixa, Thronisve, casisque.

- 
- (1) Id est: ut in Europae negotiis Respublica  
momentum addat.  
(2) Stanislai Pomiatovii Viri tota Europa cla-  
rissimi primi Senatoris Regni et exerci-  
tum Ducis.  
(3) Ex eleganti, Anonymi, Patrio carmine, hic  
sermo latino versu redditus, pluribus ta-  
men locis auctus.  
(4) Stiva, aratri manubrium, quo cursus ejus  
dirigitur.

Immortale tuae frontis decus, ipsaque nubes (1)  
 Et quae non nunquam vultus tibi contegit, umbra,  
 Anteit auricomi vibrantia lumina solis,  
 Mortalesque tui gemitus, lachrynaeque movent plus,  
 Gratia quam quaevis, risus, jocus, atque voluptas.  
 O ubi es! aut in qua regione moraris? an aula  
 Te tenet? aut turgiti te pauperis antra? locò te  
 Quò quaeram? Hercyniae sylvae an te condit eremus?  
 An praefers hominum turbas, mundi que tumultum?  
 Mortales ubi sit, qualisque sit, edite: munti  
 Nempe facent. Vos saxa rogo, vos dici te montes:  
 Te quoque Phoebè, diu noctaque volucris, ut qui  
 Utraque per Instras Orbis confinia, bigis,  
 Qua peto sede latet? videt ejus an Hesperus aedes?  
 Phosphorus an propius? sed cuncta stupentque, silent-  
 Naturae interea tamen ipsa silentia mutae, [que.  
 Et voces tacitae virtutem ad sidera tollunt!  
 Hanc omnes celebramus, eam cuperemus, et ejus  
 Nosse vias, quamvis virtutem quaerere segnes.  
 Secum quisque suos putat hanc habitare Penates,  
 Ac vitis habitus similes virtutibus aptat.  
 Temporibus nostris [et priscis forte, putamus  
 Tempora nam meliora, quibus non viximus ipsi]  
 Flagitium et virtus cultu comuntur eodem (2):  
 Equis ab hac, illud, forma discernet in una?  
 E specie nihil externa dignoscere possis.  
 Illicitum, licitis, inhonestum certat honesto,  
 Magnanimi, timidus; crimen discinctus in omne,

- (1) *Id est: ipsa nubes tristitiae, quae quasi umbra nonnunquam pulcherrimum vultum virtutis contegit.*  
 (2) *Id est: scelera sub virtutis specie, et cultu comparere volunt, illicitum sub specie liciti, inhonestum sub specie honesti, etc.*

Laeti, prudentis vaser, immotique tyrannus,  
 Ulciscens justis, vilis repensque modesti,  
 Pugnator petulans animosi, palpo (1) suavis,  
 Hic mordax critici, vappa (2) et scurrilis amoeni,  
 Languidus ille boni, durus constantis, et aequi,  
 Mendax subtilis; malus obtrectator amici,  
 Sinceri que, pii fucatus, prodigus ampli et  
 Munifici, cauti rerum custodis avarus  
 Personas sumunt, rapiunt virtutis honores.  
 Tu nòsti, tu sola Dei Sapientia summi,  
 Quid dignum, quid virtutis neque nomine dignum.  
 Sola superficies nobis patet, intima mentis  
 Nos fugiunt, errantque oculi: quin tactus et ipse  
 Fallitur, illuditque seni pellitus (3) Jacob.  
 Judicium magni Populi neque rectius, ut qui  
 Nunc Syllae (4) probat acta foro crudelia denso,  
 Nunc sanctum accusat, damnatque, rapitque Cato-  
 Nos hominum genus objectas nos disparibus res [nem.  
 Spectamus studiis, hanc laudat hic, alter eandem  
 Ridet: proque suo quaevis et opinio sensu  
 Formas dat virtuti, alias, ut collibet, uni.  
 Mercator, miles, Jurisque peritus, et augens  
 Foenore rem, varia ratione bonique, prohibe  
 Esse volunt. Sentit, dicitque Politicus acer:

- (1) *Palpo, adulator.*  
 (2) *Vappa proprie vinum insipidum: appellatur hoc nomine stulti, et insipidi.*  
 (3) *Nota Jacobi Patriarchae pelle hoedina manus tecti, historia.*  
 (4) *Syllae Dictatoris crudelia acta à populo Romano probata: Cato Vir probus et sapiens ad carcerem raptus jussu Tribunio.*

Principibus simulata sat est, et callida virtus:  
 Rure quidem simplex colitur sinceraque: . . . .  
 Cujusvis domus interea, ceu Curia: fratris  
 Quisque sui Index, et censor moris acutus.  
 Quis pejor? (1) lata est sententia. Verane sodes? (2)  
 Fors accusatus melior, fors Praetor iniquus:  
 In summa, certi nihil: Oceanoque remenso,  
 Qui felicius attinget, nescimus, arenam.  
 Judice me, Lycoris (3) picta et vestita superbè,  
 Non pejor Chloride est, cultu, gestuque modesta.  
 E zona ter quina decas (4) tibi pendula, Xyste,  
 Cur Coelo placeat plus, ad latus ense Lysandri?  
 Non facile dicas, avidus magis, estne opulentus  
 Planus? an Irus inops? an plus perjure Senator  
 In Patriam peccas? an plus hominesque, Deosque  
 Ludis Mysta sacra tangens Altaria dextra?  
 Ignotae nobis causae, finesque, quibus fit (5),

- (1) *Id est: facile sententiam ferimus in alios homines, hunc malum, hunc pejorem, hunc pessimum appellitando.*  
 (2) *Sodes, Amice.*  
 (3) *Lycoris ponitur pro femina cultu exteriori vana, quâ alia, femina Chloris exteriorè modestior, sed fortasse non est melior.*  
 (4) *Rosarium, ut vocant, à devotis portari solitum: et revera non ideo, quod quis portat rosarium, si virtute caret, erit melior Lysandro milite ense ad latus portante. Irus inops, potest esse avarior Planco divite, aequè perjurus Senator, ac perjurus Sacerdos, Deum ludunt, et peccant.*  
 (5) *Quaevīs actio est bona, vel mala à suo fine, vel causa, propter quam fit: occidit*

In se sit quodvis ut opus pravumve, bonumve. [vas,  
 Quod certum est, hominum sumit pars maxima lar-  
 Et vendit tumidas, ut facta ingentia, nugae.  
 Omnia jam sed nostra apinae (1), seu grandia, sunt,  
 Scenae, Democrito sunt, aut Heraclito dignae.  
 Ludite quisque suam, Personas, quo melius quis  
 Luserit, hoc melior fietque celebrior Actor.  
 Maximus ast Heros, Rex, et Regina Theatri,  
 Heros verus erit nunquam, Reginaque, nec Rex.  
 Qualis enim quisque est, posito se prodit amictu.  
 Vitae sine patet virtus. Cito mors inopina  
 Siparium (2) claudet. Jam tum Cato justius, an Tu?  
 Quaerèris, mundo egrediens, et limine in ipso:  
*O homo! cur huc venisti? fortassene tantum ut*  
*Exires?* Non sic prudens Octavius: at jam,  
 Jamque Charonteam cymbam ascensurus, amicos,  
 Postremum affatus, petiit: *bene lusimus? an non?*  
 Assensere omnes simul: *ergo plaudite:* dixit,  
 Personam bene se ratus absolvisse. Sed ausim  
 Quaerere: num meruit plausus? (3) oppressane carae  
 Libertas Patriae? proscripiane Romulidarum  
 Millia? regnandi causâ violatane jura  
 Omnia? aut saeculis damnanda Perusia caedes? (4)

- hominem Judex, et latro; ille propter justitiam, hic propter avaritiam.*  
 (1) *Apinae, nugae, levia.*  
 (2) *Siparium, velum theatri.*  
 (3) *Multa sunt, quae Augustum Octavium, trucem Tyrannum probent, quamvis Clementes inter Principes numeretur.*  
 (4) *Ubi fere quadringentos Patricios, florem Nobilitatis Romanae, capta urbe neci dedit; ad eorum voces lamentabiles, hoc solo dato crudeli responso: moriendum est.*

Proditus (1) aut Cicero, plausus mernere Quiritum?  
 Exitus o fabulae potius ridendus! an ergo  
 Tales semidei, templisque colentur et aris? (2)  
 Talibus aula Deum, rutilusque patebit Olympus?  
 Non, non. Vera quidem nisi, nescia labis et omnis,  
 Pertinet ad Superos, et victrix deserit Orbem,  
 Astra petitque, sui Virtus secura triumphat.

Sed jam nosse cupis, *Virtus* haec *vera*, quibusnam  
 Agnoscenda notis est denique? Cujus amussis (3)  
 Prima, Dei lex est, naturae infusa: suprema  
 Quam ratio docet, et mediam locat inter utrumque,  
 Extremum. Nimirumque vetat. Quae testibus aequae  
 Submotisque oculis censorum, semper et omni  
 Est eadem, similisque, loco. In semetque quieta,  
 Divinam dat pacem animo, placidoque gubernat  
 Imperio mentem, turgentes cordis et aestus  
 Sedat, compescitque vigil. Quae non nisi rectas  
 Tuta scit ire vias, et fraudis, Et inscia prorsus  
 Tramitis obliqui. Sortis quae ferre sinistrae,  
 Propitiaeque vices, bene novit, semper utraque  
 Major, et ambarum domitrix. Quae tota perennis,  
 (Cui soli nata est) se se curam occupata aevi,  
 Despicens rerum pereuntia. Quae popularis  
 Non cupiens aurae, vanaeque incuria famae,

(1) *Notum est prout Augustus cum Antonio convenerit de capite Ciceronis: cui Oratori Augustus imprimis debebat imperium.*

(2) *Augustus Octavius inter Deos relatus, templa illi, araeque structae.*

(3) *Regula perfectae rectitudinis, qua Architecti utuntur. Considerandae sunt hoc loci Adolescentibus verae virtutis notae, et pulcherrima ejusdem definitio.*

Utilitati hominum vacat integra. Reddere quemvis  
 Felicem, Patriamque simul, Civesque beatos,  
 Cui cordi est, impletque suas dexterrima partes,  
 Humanum genus ut juvet, et socialia cunctis  
 Commoda provideat: solers ac anxia, Leges,  
 Utque probi mores, ut fas dominetur, et aequum,  
 A primis ut opum rivus dimanet ad imos,  
 Atque rei communis amor sit ut omnibus idem.  
 Hi motus, haec virtutis conamina verae.  
 Dumque his incumbit studiis, sineque, scopumque  
 Non alium, quo tendat, habet, quam sidera! [ducit  
 Unde ortum] aeternique Boni quam praemia dignum  
 Cum virtute nihil dare possit hic infimus Orbis.

C A R M E N

IN ADVENTU AD REGIAM VERSALIENSEM.

S T A N I S L A I I.

REGIS POLONÆ, DUCIS LOTHARINGÆ,

Post mortem Reginae Uxoris Anno 1747.

*Poëta incipit à descriptione Chanteaux, quæ pulcherrima Domus è regione arcis Lunevillae, pro deliciis campestribus delineata, et extructa magnificentissimo opere fuit à Rege Poloniae. In hujus Domus Regia Aula fingitur coetus, et consilium Deorum de sublevando mœrorè, ac orbitate vindui Regis.*

**E**st locus, Elysiis, et si qua simillima campis  
Planities, medio placidus consurgit in arvo  
Collis. Apex collis mitissimus aspicit ingens  
Undique terrarum spatium, sata laeta, Deorum  
Turres, Oppida, Pagorumque rubentia tecta,  
Ludentes pratis, et amoenis vallibus amnes.  
Aspectus, sed parte tamen magis allicet illà,  
E regione, domus late quà Regia fulget.  
It via, quà non est via laetior Appia, recta;  
Tendit Apollineo telum non rectius arcu.

Hæc Arcem spectat, spectarique ambit ab Arce  
Collis, Parnassò, sed et ipsa gratior Idà.  
Colle super (nec enim tam provida gnara futuri,  
Pulchra, situs pulchros, frustra natura parasset)  
Mirandum stat Regis opus, molesque superba.  
Pulchrius hoc quidquam, nec amoenius, Itala tellus,  
Aemulanec magnæ vidisti Gallia Romæ. [dumque,  
Formam operis, quæ, sola dedit legemque, mo-  
Ars Regis, mens Regis erat. Si Memphæos (1) arces,  
Si Grajas, Latiave domos, Tarpejaque dudum  
Culmina, talis honos, talis non clarat origo,  
Dicere fas Vati, nil aede augustius ista!  
Regiæ enim penitus ducta est ab imagine mentis,  
Rex mensus, Rex descripsit, Rex duxit amussim.

Splendida, delubris atque æqua eapacibus aula,  
Invideant multum cui templa Serapidis (2) stram,  
Picturas vitæ similes, spirantia vitam  
Marmora, parictibus rutilans genus omne metalli,  
Fornicem, et in Parisi laquearia nixa columnis.

Huc Rex delecta Procerum comitante caterva  
Adventat, miscens gravibus laeta ot a curis.  
Si vero in seram durant convivia, noctem,  
Auratis crystallâ tholis pendentia, passim  
Accensos geminant ignes: it lucidus imber  
Flammarum, et toto saliens in marmora nisu  
E speculis, oculo replicata illudere gaudet,  
Seque in millenos transformat flamma colores.  
Extra, ac intus tota simul mirabilis ardet

- (1) *Memphis Urbis Aegypti Regia: pyramidi-  
bus et Regum seculchris, insignis.*
- (2) *Serapis, Apis, Oxyris perinde est: Deus  
Aegyptiorum, cultus sub specie bovis atrî,  
candida fronte insignis.*

Regia, ut innumeris dum coelum incenditur astris;  
 Maximus hanc Regum, (qui et primus in ordine Re-  
 Rex hospes miratus erat. Laudarene forsam [gum (1)  
 Plus potuit? quam dum tantum miratus, abiit?  
 Is? quo habitavit adhuc terris, aut aequore toto  
 Splendidius Regum nullus, nullusque Deorum?

His mihi, quae spectata, locis, auditaque, paucis  
 [Quorum testis eram, et memini] narrasse juvabit.  
 Nuper enim tacitus mecum dum tristitia Vates  
 Volvo fata animo, neque deplorabile damnum  
 Reginae terris ereptae, cui sua virtus,  
 Cui pietas, honor, et sancti reverentia sceptri,  
 Cui non Regis amor, populorum vota, fidesque  
 Profuerunt. Dum crudeles, accuso sorores,  
 Ausas Regalis praecidere stamina vitae:  
 Ecce autem subito, neque sum bene conscius ipse,  
 Qua vi, quove modo, sublimis in aëra tollor,  
 Unoque ictu oculi nota mihi Regis in aula  
 Sistor, et agnosco molem, rubeasque columnas.

Non locus ante mihi satis observatus, at ingens  
 Consensus, coetusque loci rapit. Undique vertor,  
 Miror, et attonitus rem totam spectro, silensque.  
 Haudque hinc licuit, [toties qui talia vidi,  
 Et Vates, quae saepe vident] haerere, quid esset?  
 Caelestes habitus, caelestia corpora, vultus  
 Majores specie humana, ac insignia Divum  
 Propria, consilium conflasse Deosque, Deasque,  
 Admonuere satis. Neque dignior ulla Tonante  
 Aula, ne hospitibus tantis toto Orbe fuisset.

Jupiter in medio [nam bajula fulminis ales  
 Mollia sacro oneri dat colla] silentia dextrâ

(1) *Rex Galliarum, primum inter Reges Euro-  
 ropae locum obtinet.*

Imperat. et Superis ita fatur: "Non latet Orbem  
 "Terrarum, curae, quam semper resque, salusque  
 "Sarmatiae mihi Regis erant, cordique. Tametsi  
 "Maluerim, scitis, jactari casibus illum,  
 "Adversis plus, quam rebus gaudere secundis,  
 "Nulla salutavit litus tot quassa procellis,  
 "Ventis tot navis, tot tempestatibus acta.  
 "Ast hic mos meus est, haec lex aeterna, probandis  
 "Hae mihi sunt propriae veris Heroibus artes.  
 "Proficit his virtus ad summum. Et scilicet ista  
 "Semideos decet ire viâ. Sic itur Olympo.  
 "Hoc solum est iter ad Superos, et gloria tanti est.  
 "Iudice me, si hominum nullus magis aspera passus,  
 "At nullus majore animo. Tranquillus, utrique  
 "Vultu quam semper fortunae, occurrit eodem,  
 "Spectavi, et quam aequae laetis, ac tristibus usq,  
 "Excidit immota nunquam sapientia mente.  
 "At quia in humanis est invariabilis ordo  
 "Rebus, et expleri cuivis sua fata, necesse:  
 "Ut tandem suprema animi vis hujus, et omne  
 "Robur, et hac quid summum est in virtute, pateret,  
 "Tali magnanimum ferii modo vulnere pectus,  
 "Quo nondam, fateor, persensit acerbius ullum.  
 "Haud ignota loquor. Scio, quid sit perdere vitae,  
 "Fortunaeque omnis sociam, mentisque levamen,  
 "Dimidiumque animae; teneram, si prospera, fidam  
 "Adversis comitem. Aeterno quam foedere junxit  
 "Connubium felix, et tot firmaverat annis  
 "Sancta fides, et amor, fideique, et nexus amoris  
 "Consimilis virtus, eadem constantia, eadem  
 "Certae Regni artes, Partiri haud aptius, atque  
 "Sustentari humeris potuit non dignius unquam [dam  
 "Majestas paribus. Si fas decreta fuisset  
 "Ante hominum genus, et nascentem condita mun-  
 "Cumque illa unde fluunt mutari nescia, mente]  
 "Immutare seime, stataque exsolvere lege,

"Hoc mihi profecto par immortale maneret,  
 "Gauderentque throno Rex, et Regina perenni. st e]  
 "At frustra est. Nulli Regum indulgetur. Eundum  
 "Ordine fatali, quo quivis exit ab urna.  
 "Maximus hic Regi est ictus, sed et ultimus idem;  
 "Inficit ista diem nubes postrema. Deinceps  
 "Clari illi soles Pylios volventur in annos,  
 "Flaque deducunt meliores aurea Parcae.  
 "Dique, Deaque omnes, terrestres, atque superni,  
 "Nunc agitur, justos vidui lenire dolores  
 "Principis, et ratione valet qua quisque screnos  
 "Semper ferre dies, et amoenae tempora vitae.  
 "Divisum vobis studium, ac industria; in unum  
 "Sed mites, facilesque scopum concurrite Divi.  
 "Hoc libet. Haec mea mens. Hoc coetum fine coëgi.  
 Primò, [namque minax potuit sub casside vultus  
 Dignosci,] Mars verba locò sic coepit: "ab ipso  
 "Flore aetatis, ego Juvenem complexus, amavi;  
 "Vistula, quin totus Septentrio testis, et olim  
 "Hunc inter, Carolumque (1) à me partita trophaea..  
 "Ambo fuere mei, [mihî erat nil carius illis]  
 "Sarmatiae Rex, et Gothicus Bellator, alumni.  
 "Multum Teutonibus noti, domitoque Sicambro.  
 "Nullis, robustae persaepe vacare senectae  
 "Tam libet, ut studiis, quibus asuefacta juventa.  
 "Arma, arma! ast tota hic fremitu, ingentique tumultu  
 Personat, Aeolis fragor haud immanior antris,  
 Aula, nec ardentem plus fari concio, Martem  
 Mota sinit: tandem sedato murmure vocum  
 Armisonum affatur placido sic ore Minerva:  
 "Non haec expediunt. Regis tranquilla fruatur  
 "Florida quèis aetas ornavit tempora lauris.

(1) *Carolus XII Sueciae Regem.*

"Magno be" a, icet, magno arma, Gradive, Nepoti (1)  
 "Linque, cui venis calidis, et pectore toto  
 "Martia seivet Avi virtus, Tritavique, Patrisque,  
 "Quorum perpetuos augebit et illi triumphos.  
 "Rex, [cujus nunc cura Jovi est,] in semet, et intus,  
 "Intra animum, causus omnes, et toelia vitae  
 "Quo soletur, habet, quo tristes dissipet horas.  
 "Si tu belligeris, at ego sapientibus illum  
 "[Laudum haec summa est,] Philosophis, et Regibus  
 "Nec video quonam valeat praesentius uti [addo  
 "Consilio, afflictis qua certius arte mederi  
 "Rebus, quam sibi ut haec solatia praebeat, ipse  
 "Quae possit praebere sibi. Non indiget, unde  
 "Sit felix, nisi se solo. Mens scilicet ista,  
 "Fontis inexhausti, pelagive simillima, semper  
 "Sufficiet sibi, perpetuis ditissima venis.  
 "Saepius interea Regis conclavia visam  
 "Ipsa frequens, operamque dabo, ne forte dici,  
 "Aut noctis carpant aliquam fastidia partem;  
 "Ipsaque selectis ornabo Regia librîs  
 "Pulpita: Nam quantum Rex haec amet otia, novi;  
 "Inter adoratas populis felicibus Aulas,  
 "Quo non est, qui sceptra gerat, sapientior alter,  
 "Non cingit diadema caput, quò doctius ullum.  
 Quanto Divorum hic incessit Curia plausu!  
 Visaque fatidicae effata probasse Minervae.  
 At simul accendi magis hic certamina vidi  
 Coelieolùm. Insignis, mirusque cuilibet ardor,  
 Et variare modum, et mentem divertere Regis.  
 "Telis, et cornu, et curvo spectabilis arcu,  
 "Laeta suos offert arcus, sua tela Diana,  
 "Alipedesque canum bigas, et quidquid opacis  
 "Montibus, aut aluit densis Austrasia (2) sylvis,

(1) *Delphino Galliae.*  
 (2) *Lotharingia.*

Ant tacitis quidquid fluidum secat aëra pennis;  
 Et colles, vallesque sumum jus cedit in omnes,  
 Omne nemus, lucos faciles, camposque patentes,  
 Quaque fugax mollem notat ungula, et unguis arenam.

Nympharum sed enim reliquis formosius agmen  
 Conclamant: se posse aliquid dare Principe dignum:  
 Areolasque suas certatim, et Dryades hortos  
 Jactavère suos, ac arte, atque ordine, quercus,  
 Proceras platanos, et jussas crescere pinos.  
 Praeque-tuère suos fontes, Insusque suarum  
 Naiades undarum, quamvis sub iudice lis sit.

Res alias, aljae; sed enim fuit nna Dearum,  
 Principio mihi non satis agnita. Circinus illi,  
 Linea rectifluens, et amussis, et aurea trulla  
 Splendebant. Habitu, quales candente pererrant  
 Caeruleae, roseae, flavaeque in marmore venae:  
 Conjeci mox hisce notis, hac veste, quod esset  
 [Glyphen dixerunt Graii] pulcherrima Glyphe:  
 Aedibus, ac templis Divum, Dea nata strendis.

Illam autem in tabulis, vario depicta colore,  
 Sollicitam dimensa manu, mistosque Latinis  
 Jonios imitata modos, legesque Corinthi,  
 Fana Deum, miras, turrita palatia, moles,  
 Quae paries poseit, quaeve ornamenta lacunar,  
 Mirandos portarum arcus, aditusque superbos,  
 Immensasque operum facies monstrabat. At aedes  
 Collectas, parvasque domos, campestria tecta,  
 Hortensesque casas, ornat gratia quaedam  
 Major. Et in parvo major patet arsque, laborque.

"Haec placuisse olim semper, semperque, docebat,  
 "Otia munifico haec fore jucundissima Regi.  
 "Ista suis Patrem populis, sanctumque Parentem  
 "Ista decent. Hac arte suis aëria cerdo  
 "Cum Dominis partitur inops. Sic perpe nummi  
 "Ad vulgus cursu remeant. Opulentia floret  
 "Tribus, et socors pagis arcetur egestas.

"His regalem animum studiis, rebusque teneri,  
 "Ista placent. Haec delectant. His ille vacabit.  
 "His, si quae suberunt, curas et taedia pellet.  
 Assensere Diis: sed enim quid? [maxima Juno  
 Ipsa Jovem propius divinam admotam curuli  
 Alloquitur.] "Quid quaeso rei est? quae causa? <sup>supre-</sup>  
 "Nempe mali tanti vos praeterissem medelam? [mam  
 "Est aliud potius, summumque, unumque levamen,  
 "Certa ac una salus: est Filia (1), Jupiter, olli,  
 "Filia, quam nihil haec vidit praestantius aetas,  
 "Quam nullus meliore Parens gavisus, et aevo,  
 "Nullum, hoc, majus Opus, nullum Te dignius, istae  
 "Formavere manus. Nec fas erat, axe jacentem  
 "Tellurem sub utroque, Pater tua dona latere;  
 "Attoniti spectant populi, gentesque remotae  
 "Primis sublimem solius, ad culmina primi  
 "Evectam toto orbe, throni. Sic digna videri  
 "Sic meruit pietas, et summus denique summae  
 "Virtuti debetur honos. Possitne profundum  
 "Vulnus, idemque recens vidui mitescere Regis?  
 "Quam vultus istos, haec si velit ora tueri?  
 "Hanc frontem? hos oculos? quibus est nil carius illi?  
 "Quid differt? quid agit? quid propria sponte moratur  
 "Gaudia? fatales heu deserat ocyus arces,  
 "Crudelemque locum. Quod non lenimen? et ipsius  
 "Sentiet in lachrymis, quae non solatia? tantum.  
 "Praesentem aspiciat, qua scit se prole beatum.  
 "Illi, et amor populi meruit qui jure vocari (2),  
 "Maximus et belli studiis, et pacis, at una  
 "Cor, animusque tener, facilis pietate moveri,  
 "Ac in carorum fortuna, et casibus, ipso  
 "Euryalo, Pylade, et Druso plus mitis, amicos

(1) *Maria Lescinia Regina Galliae.*  
 (2) *Ludovicus XV. Carus.*

"Rex genor amplexus parat. At non Belga (1) revulsis  
 "Oceani claustris, trepidus qui terret, in armis  
 "Ad ripas Isalae (2) talem adventare videbit.  
 "Non talem, Austriacus vel clade ferocior ipsa,  
 "Spectabit, domitos toties dum perget in hostes.  
 "Helluo, non talem, patrii sitiensque cruoris,  
 "Qui nunquam propria satiat se caede Britannus:  
 "Sed socero innata occurret dulcedine comis;  
 "Lenis et interea meditata exuet iras.  
 "Insuper aspectus cari augustique Nepotis,  
 "Insuper aspectus, cararumque oscula Neptum?  
 "Fortior haec, quo non majorque dolore, voluptas?  
 "Praeterea tenero quas non et Regia Princeps (3)  
 "Delicias praebit Avo? quae sola reperta  
 "Primo digna Proco, [manibus date lilia plenis!]  
 "Borboniis stirpem aeternam, haeredesque datura,  
 "Cujus hymen, dum rite faces accendit amoris,  
 "Extinguit taedas, priscique incendia belli,  
 "Et stabili sociat Reges, ac foedere Regna,  
 "Quam, quisquis spectarit, amet, laudetque, colatque.  
 "Reginae, quae mille modis studiosa, Patrisque  
 "Devincit sibi pectus. Amat quam Gallia supplex,  
 "Et miratur; Et est juveni dilecta marito,  
 "Conservare et Avo mentis sciet illa serenum,  
 "Moeroris sciet illa atras dissolvere nubes.  
 "Jam paucis ego: sit magnus, sit durus, at inter  
 "Divisus tot corda dolor, vim franget acutam."

- (1) *Bellum Gallicum in Germania et in Belgio tum fervebat, Rexque Galliae ipsemet ad Castra profecturus vulgabatur.*  
 (2) *Fluvius Belgii Batavici in Provincia Transalana. [Over-Yssel.]*  
 (3) *Regia Poloniae Princeps è Demo Saxonica, Maria Josepha, Consors Delphini.*

Et Superi, et Superum Pater hoc meliore steterunt  
 Consilio. Regi citius perferre jubetur  
 Mercurius mandata Deum pennatus; iterque  
 Suadeat; edoceat, quam illi bene cuncta precentur  
 Nummia, quanta Diis ejus sit cura salutis.  
 Inde redit; moneat [nondum si carcere clausi]  
 Aëlios fratres mox ut toto aethere cedant;  
 Flatus ut placidis soli comitentur, et omnem  
 Temperiem Zephyri spirent, auramque salubrem;  
 Phoebe (1) nocturnos pareat, ut clarusque diurnos  
 Phoebus equos. Cessent submotis nubibus imbres.

Haec dum ausculto libens, et agi dum talia cerno,  
 Insomnis, penitusque mihi vigil esse videbar;  
 Sed subito rerum facies disparuit omnis. pheu! (2)  
 Quod si somnus erat? [tua sunt haec munera Mor-  
 Is somnus coelestis erat. Sed denique eri  
 Somnia semper habent partem: Quid somnia Vatum?

Ast tuus [o! inter Reges, Heroas et inter  
 Summos, quos unquam geminus spectaverat Orbis,  
 Accensende, diu variis exercite fatis],  
 Haud istis, Rex, consilii mitescet, at ipsa  
 Relligione dolor. Promptus parere supremæ  
 Est animus legi, mens una tibi que, Deoque.  
 Numinis imperio facilis, sine murmure, fronte  
 Excipis immota tranquillus, Regibus aequè  
 Communes, aequè miseris mortalibus ictus.

(1) *Phoebe, Luna; Phoebus, Sol.*

(2) *Morpheus Somni filius.*

FINIS.

STANISLAI  
KONARSKI

E SCHOLIS PIIS

CARMINA POSTHUMA.

---

IN SOLENNI DIE INAUGURATIONIS  
SERENISSIMI ET POTENTISSIMI  
STANISLAI AUGUSTI,

REGIS POLONIE MAGNI DUCIS LITHVANIE etc.

*Cum Corona Regia, Libertatis colloquium,*

---

**D**igna fide referam: Vates nam talia, rapti  
Extra se Phoebi munere, saepe vident.  
Sacra Coronati vidi Conclavia Regis,  
Et mensam, super hac et Diadema nitens.  
Mox venerabilior mihi visa est una Dearum:  
[Majestate oris rebar adesse Deam]  
Lauro tecta Caput, Chlamys aurea, et aurea vestis.  
Arcu armata humeros, enseque cincta latus.  
Ingens frontem Adamas ornat; pretiosius illo  
Utraque nil, et nil India majus habet:  
Hunc circum gemmis rutilans nitet undique nomen;  
*Libertas*: nos: rae suave decus Patriae.  
Regali, primum Dea, figit dulcia, Serto,  
Ex omni teneris basia parte labris.  
Sublatamque manu sic est afflata Coronam:  
[Si meminim, multum est, reddere verba Deae]  
Saxonas ante duos, Bojos (1) [ait illa] petisti,  
Pannonas et Gallos atque Palaemonios (2).

---

(1) *Bohemos:*

(2) *Lithuani à Palaemone.*

Venceslaus enim, Lodoix, Magnusque Jagello,  
 Atque Jagellonum stirpe cadente, Tibi,  
 Valesius, bellax Stephanus, tum Vasa, duoque  
 Otthonides (1), Patriis plus placuere precis.  
 Ast hodie, quae sunt mea gaudia? scilicet aptum,  
 Teque Domi dignum, Te reperisse Caput!  
 Quid iuvat, Dominos quaesisse per exera Regna?  
 Propria prae nostro quis placet Aula Throno?  
 Quos toedet natale solum liquisse suosque!  
 Nos a Sejanis (2) qui voluere regi?  
 Ne tamen immemorem, minus aut me vivere gratam,  
 Forte peregrinis Regibus esse putes,  
 Incoepi, crevique sub his: obliuia nulla  
 Illorum rapiunt munera, nulla dies.  
 Ast in perniciem me tanto a tempore labi,  
 Et Patrias leges nonne ruisse vides?  
 Juribus atque meis inimica *Licentia*, bellum  
 Quam mihi funestum perpetuumque gerat?  
 Pulsa Themis! versat patrios Audacia vecors  
 Fasces, susque ferox omnia deque movet.  
 Relligio, dirae accusata superstitionis,  
 Temnitur. Impietas laeta peana canit.  
 Perfidiae, caedes, perjuriam inulta, rapinae,  
 Hoc è fonte fluunt, nulla thoriqae fides.  
 Nil prisci moris: pietas, candorque, pudorque,  
 Exulat. Innocuos et pudet esse probos.  
 Plus sed adhuc mihi quod dolet, est id, nomine sem-  
 dum Libertatis se tegit omne scelus. [per  
 Insultat, dirosque ciet vicinia risus:  
 Ast ego muta, sileus, nec nisi tempta gemo.  
 Nulla malis tantis medicina modusque salutis:  
 Nullus, qui moestae consulat, aut det opem,

(1) *Saxones, Otthonum nepotes.*

(2) *Minister malus Tiberii Imp.*

Nam sine consilio ter denis jam prope lustris,  
 Reges me et Cives deseruere mei.  
 Prorsus ad hanc tristem me sceptrae extranea sortem  
 Porsum ad hunc miserum me populere statum.  
 Ah! adventitiis Dominis, an amabitur unquam  
 Libera gens; nequeunt meque, meosque pati,  
 Legis inassueti jussis, sua iussa supremas  
 Leges, invitis Civibus esse volunt.  
 Ingentes sero jam Tibi, felicissima, grates,  
 Laetor et ad Piasti Te rediisse Caput.  
 In me, cui et ego, ac in libera colla meorum,  
 Protinus Imperium sceptraque trado libens.  
 Expertam, scio me, majorem ullius amorem:  
 Quippe simul lusit, crevit et Ille meo.  
 Illeque, me melius, mea vulnera novit, ab illo  
 Est speranda meis certa medela malis.  
 Accipe jam brevibus: spes omnes colloco, Rege  
 In *Sapiente* meas, ac in *amante* mei.  
 Hic, [solum ut roseo Thaumantias ore (1) Corona  
 Reddidit intentae talia verba Deae:  
 Cum jam Delicio populi, cum gentis Amori,  
 Me, [Jove supremo Teque iubente] dedi:  
 Quam Tua grata mihi fiducia! Principe, quod spem  
 In Sapiente locas, ac in amante Tui.  
 Macte animò, Princeps, cinxi cui tempora, verus  
 Nempae Tuus sanguis, vera Tua est soboles:  
 Quique fuit Civis, Patriae qui Filius, idem  
 E Cive: et Nato, Rex, Patriaeque Pater.  
 Ille Tuis certe cum sit nutritus in ulnis,  
 Deque Tuar recipit Regia sceptrae manu,  
 Diliget instar Te, caraeque bonaeque Parentis,  
 Ac Tecum curas dividet Imperii.  
 Et decus, et priscum [nil saeva licentia terret]

(1) *Iris apud Ovid.*

Restituet robur legibus Ille Tuis.  
 Libertas pulchrae hic dedit oscula mille Coronae.  
 Reclusae subito sed patiere fores.  
 Et Dea mox, et scena statim disparuit omnis:  
 Ac Vates, haesit solus et attonitus:  
 O fortunati nimium, jam plaudite Cives!  
 Propitii lapsis Di meliora dabunt!  
 Majestatem inter Libertatemque, cohaeret.  
 Tam bene! quod faustum, quod sit utrique bonum!

DIE NATALI

SERENISSIMI

STANISLAI AUGUSTI

REGIS POL. M. D. L. D. N. C.

DE FORTUNA.

Anno 1768, 17 Januarij.

**Q**uis Reges doceat regnandi callidus artem?  
 Augusta versent quomodo sceptrum manu?  
 Nemo! praeterquam Fortuna adversa. Lycaeo,  
 Zenonisque, schola haec, Regibus est melior.  
 Heroës hic fata probant: exercita virtus  
 Tendat ut ad summos proficiatque gradus.  
 Nam nequeunt magnis, possunt mediocribus addi,  
 Hi, quibus laeta fluunt omnia, Principibus.

Hic discunt, quanti est hominum sapientia, contra  
 Vim Fati, absque pia Religionis ope.  
 Hic, quas dent animo vires adversa, deentur;  
 Qualis certando firmet athleta humeros:  
 Qualis ventorum furis pressa undique, figit  
 Quercus radices firmius alta suas.  
 Sorsque Coronae eadem: nam tanto firmius haeret,  
 Arctius emeritum stringere jussa Caput,  
 Quanto majores prius est experta labores.  
 Dis superis nihil est gratius, hac acie,  
 Dis nihil est visu jucundius, ut bonus est Vir  
 Fortunae luctans; iudice Philosopho; (1)  
 Jam quid! in hac Reges ipsos spectare palaestra?  
 O quantum referunt laudis et inde boni!  
 Hic discunt, an sint homines? mortalibus isdem  
 Aequè subiecti casibus, atque malis.  
 Quisque sit Ille, cui solium, diademaque debent,  
 Cujus et imperio stant, titubantque Throni.  
 Hic discunt, veros inter discrimen amicos,  
 Et male venalem, fictitiamque fidem.  
 Nosse suos, quanti est! Ast infelicia tantum  
 Ostendunt et dant tempora, nosse suos.  
 Optime Rex! hodie, quis non ardentibus implet  
 Nempe aures votis angurisque Tuas?  
 Cunctorum per et ora sonant Tua resque, salusque;  
 Gloria, prosperitas, vitaque Nestorea.  
 Sed nitidum solido discere, re jam bene nôsti:  
 Scis et ubi pugnet dissona lingua animo.  
 Attulit id lucri Tibi praesens alea rerum,  
 Quod sors ferre Tibi prospera non potuit.  
 Jam sine fraude potes, [faustum quod sit Tibi] servi  
 Qui sunt Fortunae, noscere, quive Tui.

(1) Seneca.

STANISLAO AUGUSTO

REGI POLONIAE, MAGNO DUCI LITHVANIAE

SACRO SUE MAJESTATIS

ROMINI DIE, 1769.

DE UTRAQUE FORTUNA.

**A**dversus cum Fortuna, velut hoste feroci,  
Si certamen atrox, palmaque difficilis,  
*Ridenti blandaque* tamen certare, pericli  
Plus. Manet haec summos laurea rara Viros.  
Curriculo vitae toto pugnat utrique,  
Praesidibus pugnae, iudicibusque Diis.  
Jupiter Heroas solio nam spectat ab alto,  
Divinaque tenet penpula sarta manu.  
Nil praestabilius, nihil est jucundius illi,  
Quam dum Fortunaec congregitur Sapiens;  
Gaudet, prostratam victori cedere Divam,  
Irataeque teri sub pede colla Deae,  
Quam tamen ingratum est illi, persaepe videre,  
Quem *mala* non vicit, succubuisse *bonae!*  
Ardua virtutem exercet, quam prospera frangit;  
Utraque inmotus qui stetit, ille Vir est.  
ui melius te, *Auguste*, vices utriusque probavit?  
Q Et placidae, et dirae, cui ita nota manus?

E Cive ad solium ferri, diademate cingi  
Tempora, quid potuit faustius esse homini?  
Cum magnis opibus, cessit cui summa potestas,  
Summus cessit honos, et decas imperii,  
Dignius invidia, quid aut felicius illo?  
Ast quanta fuit hic vi Tibi Mentis, opus?  
Relligio, Virtus, praeses Sapientia rerum,  
Ponere fortunae Te docuere modum.  
Sic Princeps in Te Civem non sustulit; ambo:  
Rex, Civisque, uno discubere throno.  
Regem Te, sceptrum, sed prisca modestia Civem  
Ostendere, Titis Aureliisque parem.  
Dis ali se se aequiparant; humanius ut nil,  
Nil sit amabilius Te, *STANISLAE*, studes.  
Aequales, olim quos natus es inter, amore  
Ut Patriae superes, unica cura tua est.  
Prosperitas in Te nihil immutavit; ut ut sit  
Corruptrix nostri prosperitas generis.  
Ergone de me mens haec incorrupta triumphet?  
Heroum victrix (1) exitialis, ait?  
Indignata igitur Dea, non potuisse superbis  
Donis majorem vincere regno animum,  
Tempestatem Erebo motam tibi suscitavit uno;  
Armatas facibus fundit et Eumenides;  
Ferro ignique ferunt, quae pagis, urbibus, agris,  
Horrida Avernales damna queunt Furiae.  
Omnia praeterea comes his Discordia miscet,  
[Monstrum Tisiphone saevius anguifera]  
Legibus eversis, omnem Fideique, thronique;  
Ac Libertatis subruere ausa basim.  
Ista gemis spectans *AUGUSTE*, tuumque dolorem  
Nulla suo superat pressa dolore parens.

(1) *Prospera Fortuna.*

Sic pius Aenas pereuntis funera Troiae,  
 Romuleam cladem, sicque Camille doles.  
 Campns hic est AUGUSTE Tuæ virtutis: hic almae,  
 Est animæ Lydius, Consillique lapis.  
 Dicere fas, raros certe è mortalibus, ut Te  
 Rex bone, vi tanta coeca Dea impetiit,  
 Invictum sed pectus ad hoc quot inania tela  
 Fregit? et in forti pectore franget adhuc?  
 Rupe velut celsa, sic summo è culmine mentis,  
 Despicias, insani saevit ut ira maris  
 Te tumidi assiliant fluctus, te fulmina circum  
 Undique densa ruant, impavidum ferient.  
 Non Tua, sed Patriæ Patri tibi, publica damna;  
 Et mala, quæ populus sentit acerba, dolent.  
 Devotum pro gente libens et ponere promptus  
 [Ne placeas solus Tu Tibi Corde] Caput.  
 Cetera, fortunæ rabiecm contemnis et ictus,  
 Conatusque leves debilis invidiæ.  
 Macte animo! Jucunda Jovi spectacula præbes.  
 Praesagum Coelo Nomen et omen habes: [p  
 STANISLAUS erit *Stans Laus*, *Stans Gloria* (1) sen  
 Fortunæ nisus, invidiæ que cadent.

(1) *STANISLAUS* è *Patrio idiomate significat*  
*Stans Gloria, vel Stet gloria.*

C A R M E N

A D

STANISLAUM AUGUSTUM

POLONIAE REGEM, MAGNUM DUCEM LITHVANIAE

DOMINUM CLEMENTISSIMUM.

DIE NATALI SUÆ MAJESTATIS SACRO.

17 Januarij 1770.

Sacra TUE, quæ lux orditur tempora vitæ;  
 Haec eadem nobis, o! REX, ingentia de Te  
 Deque TVÆ Genti, à Superis Dis sorte statuta  
 Fata aperit. Pelago reducis dum spicula Phoebi,  
 Ac matutini pellunt dum luminis ictus  
 Artificem somni, segnemque soporiferumque  
 Morphea: jam vigili, haud noctis simulacra, nec ullæ  
 Illusere umbræ, nec inania somnia Vati;  
 Sed mentem sublime rapi, sistique supremi  
 Ante Jovis solium se sensit; imagine rerum  
 Nondum visarum attonitus, laetusque pavensque,

Tam nova spectandi, quanta illum, quæque cupido  
 Incessit? sed enim frustra. Res unica totum  
 Obruit, et subito sensus influxit in omnes;

Imprudenter agat, cum nil sibi consulit ipsa,  
 Magnos consilii coctus cum improvida rumpit,  
 Unus cum animae venalis voce, salutem,  
 Et libertatem Patriae, legesque sacratas  
 Funditus everti sinit, inconsultaque certum  
 Currit in exitium; propriae sibi conscia culpa  
 Advertat potius, quo peccet: et integra si vult,  
 Esseque si felix, si libera, si diuturna,  
 Omnem in consiliis fortunam ponat et armis.  
 Objiciet melius tum, juncta cum Jove dextra,  
 Arma armis, certas et vires viribus hostis.  
 Castigata quidem sapiet, propriisque ruinis  
 Docta, salutiferis melius stata tempora per me  
 Consiliis solers concorsque impendet, et ipsa  
 Prospiciet sibi, quo stet longo, et floreat aevo  
 Integra, tuta, potens, sapienter libera, felix.

Quod jam verò meâ refert, oratur ut à me:  
 Imponam finemque malis, metamque labori  
 Ocius, ac sperat mortalis, nescius horae,  
 Anxius, incertus, metuens semperque futuri.  
 At mihi dilectum quod spectat, Filia, Regem:  
 Heroem volo, prae reliquis mortalibus illum,  
 Ardua res. Constat, nihil esse in Principe magis,  
 Si quem perpetuo rebus gaudere secundis  
 Forte sinam, humanis exemptum casibus ultra  
 Tranquillumque. Deest illi virtutis arena.  
 Attollunt ad Semideos adversa. Mihi si  
 Istius ingens vis animi non nota fuisset,  
 Haud illum tantis si vissem hucusque procellis  
 Impeti, At alta quidem, medio vel in aequoris aestu  
 Stans rupes, animo minus est immobilis isto.  
*Religio et Ratio*, vires sunt Ejus, opemque  
 Aeternis asserre solent. Placet Illius alma  
 Pax mihi mentis, et est animae certissima testis  
 Innocuae. Placet hic tacitus, Sceprique Thronique,  
 [Si Patriae res exposcat, sit et utile Genti]

Contemptus mentis summae, laus summa decusque,  
 Totum se Patriae, populique litare salutem,  
 Quid memorabilius, quid majus Regia virtus  
 Ostendit terris? Meriti hoc est culmen apexque.

Fixum est: regnabit, fortunâ major utraque,  
 Major et invidia. Dispersis nubibus atris,  
 Clarior emerget geminoque illustrior Orbis;  
 Tumque Pater Patriae, tum libertatis Alumnus  
 Noscetur, semperque latens in Principe Civis.

Haec post dicta Jovis, Vates quibus undique totus  
 Laetitis incescit! et haec audita bonorum  
 Omnia Fatorum, quam plura audire negata,  
 Exacere sitim? sed enim disparuit aulae  
 Coelestis facies, Votis nisi, speque relictis.

O D E

A D

STANISLAUM AUGUSTUM

REGEM POLONIAE M. D. L.

EX OCCASIONE OBLATI AB ILLO AUTORI NUMISMATIS,  
EX UNA PARTE EFFIGIEM EJUS, EX ALTERA VERO LI-  
BROS, CUM INSCRIPTIONE: *SAPERE AUSO*, PREFE-  
RENTIS.

*Vanam esse è Numismatum et Statuarum hono-  
re superbiam. STANISLAO AUGUSTO Clemen-  
tissimo Regi debitaè ab Autore referuntur gra-  
tiae, quod immeritum singulari beneficentia  
ornet hominem, et in numero suorum collocet.*

**F**astidiosam mene superbiam  
Fas est, et altos sumere spiritus:  
Si auri, vel argenti, vel aeris  
Lemniaci liquefacta flammis (1)

(1) *Lemnos insula maris Aegæi, in qua cole-  
batur Vulcanus artifex elegantissimorum  
è diversis metallis operum.*

Ac in rotundum lamina ductilis,  
Portare nostram cogitur icona;  
Si ferre Gypsum, vel jubetur  
Nostra lapis Ligurinus ora? (1)  
Ferat: sed quid vanius aspici?  
Ad nos relabi propria Caesarum? (2)  
Bovi invident adhucne ranae? (3)  
O hominum tumor! appetentum  
Frustra pusillis, tam male quae quadrent!  
An fultus alta pumilio (4) basi,  
Tytanus (5) aequet? Parva magnis  
Contuleris, venient minora.  
Subinde nanus gratior in suos  
Contractus artus. Si sapiis, et supra  
Te nil, et extra quaere. Nosci  
Nec nimium, tibi notus ipsi  
Contende. Prudens, qui sibi sufficit,  
Beatus est nil animò, sua  
Qui sorte contentus. Docere  
Quid gravius, meliusve possint  
Coeleste Verum, Philosophiaque?  
Hac arte tutus, temnere cautior  
Majora me suevi, nec ambì  
Terribili invidiosa vulgo.  
Tranquillus imos praeterit, at caput  
Paulo levantes è mediocribus,

(1) *Liguria, hodie Genuensis tractus, unde can-  
didissima marmora adportabantur.*  
(2) *Numismata, Statuae, antiquitus solis He-  
roibus ac Caesaribus erant propria.*  
(3) *Nota Aesopi fabula de rana et bove.*  
(4) *Pumilio idem ac pygmaeus, seu nanus, ho-  
mo parvae ac humilis staturae.*  
(5) *Gigantes.*

Mox garrula loquacitate  
 Exagitans, sale spargit acri.  
 Caelatae in auro, vel nive pulchrius  
 Candente petra, Numen imaginis,  
 Multum decori, saepe sed plus  
 Invidiae popularis augeat.  
 Quid ipsa jam sit res? meditor. Nihil;  
 Firmum nihil, si marmoribus quoque,  
 Ut ut durent diu, senecta, et  
 Mors Populis venit, ac avara  
 Aetas Colossos rodit aeneos.  
 Illustrium quot dudum hominum, satae  
 Corinthiis, Grajis, Latinis  
 Porticibus, periëre sylvae?  
 Superba signis innumeris Rhodos (1)  
 Et mole solis, viscera montium  
 Secare, rimariquë aduncò  
 Regna Pluti (2) fuit ausa ferrò,  
 Aes omne tollens, marmor et omne, queis  
 Ars mira vitam, quam potuit, dedit  
 Saxis, et effingens metallis  
 Ora hominum, eripuitque denti,  
 Ac vi malignae temporis invidi,  
 Ducesque, Regesque immeritis mori,  
 Virosque, quos secrevit ingens  
 E populo, superisque virtus

- 
- (1) *Rhodus Asiae Insula, metallis et marmoribus omnium abundantissima, aequae ac sculptoribus, quorum unus Chares Rhodium Solis colossus, septem miraculis mundi adject.*  
 (2) *Plutus Rex apud veteres subterraneorum fodinarum.*

Dis miscuit, quos laus sapientiae  
 Sublimis, et mens Civibus utilis  
 Exemit è vulgo; salusque,  
 Quos Patriae, integritasque Legum  
 Defensa, gratis tradere posteris  
 Jussit merentes, denique gloria,  
 Quos ipsa, nesciri futuris  
 Impediit, vetuitque saeculis.  
 His, sculptor udo pulvere sordidus,  
 Andaxque Vates, et levis, in suis  
 Promisit immortalitatem  
 Iconicis (1) statuis, et aris.  
 Horum tamen vestigia jam quota  
 Cernis? et horam si qua manent ad hauc,  
 Nomen sed ignotum, sed aera,  
 Sed titulos rapuit vetustas.  
 Rectenè jam mortalibus omnibus  
 A rite sectis rupibus? aequae  
 Faso? vel imprimis petita  
 Perpetuae monumenta faunae?  
 Senis (2) at illud prodigium additum  
 Orbis vetusti prodigiis, ubi est?  
 Illi aerei, saxaeque Patres?  
 Idve nemus statuarum inane?  
 Labentis aevi nonne eadem manet  
 Fors, et Charetes? et Phydias? Brevis  
 Dies opus demolietur  
 Brune (3) tumque meosque vultus

- 
- (1) *Iconicis pictura, aut sculptura.*  
 (2) *Sex Orbis miraculis septimum Rhodium colossus adjectum.*  
 (3) *Mr Le Brun praestantissimus Varsaviae Statuarius Regius simulacrum Auctoris jusse Regis fecerat.*

Jactus procaci forte silex manu,  
 Naso minorem me puerilibus  
 Exponet, aut luscum, cachinnis,  
 Aut mutila patienter aure.  
 Oblata quod jam nomina diluit  
 Lethæus amnis? Tempus edax notos  
 Arrosit Heroës, et olim  
 Trunca silent simulacra priscos.  
 Haec optet ut vult, qui monumentò eget;  
 Meum supremo proximus ut dies (1)  
 Nomen vel aeterna sepultum  
 Paetereat taciturnitate,  
 Quid quaeso surdi pulveris interest?  
 Humum perosae mentis (2) adhuc minus;  
 Erepta quae terris, et astris  
 Altior, ac Jove plena summo,  
 Humana Caeli è vertice despicit,  
 Ridens laborum, quæis nimium brevem,  
 Et frivola[m] celebritatem  
 Frivola gens hominum precatur  
 Non me cornu[m] dona Numismatis,  
 Nec sola Magni gratia Principis  
 Oblectat, ad censum fidelè  
 Ingenua[que] probaeque turbæ.  
 Honos, decusquè munera Regia  
 In immerentem prodiga, sunt meis  
 Cantanda Musis, et decenter  
 Vel tenui celebranda plectrò.  
 Utràque fortunà edomità, mihi  
 Auguste major! Rex sapiens! Tui

- (1) *Supremus dies est vitæ ultimus dies; proximus supremo est dies à morte crâstinus.*  
 (2) *Perosus, exosus; mens hominis corpore soluta terram odisse et despiciere videtur.*

Me non inornatum relinqui,  
 Quae bonitas, pietasque cordis?  
 Brevi Tuæ me munificentiæ  
 Si forsan instans eripit Atropos,  
 Sed incitamenti, et caloris  
 Quantum! avidæ decorum Juventæ?  
 Virtutis ut eos præmia sunt, ita  
 Torpentis ingens calcar inertiae,  
 Hi pacis, artibusque belli  
 Sunt stimuli. Tua dona, Princeps,  
 Excepta grati pectoris intimo  
 Sensu, calentem plus animum incitant,  
 Ad devò vendum vel caducae  
 Si quid adhuc superest senectæ,  
 Quosque Regi et vivere Civibus,  
 Jam jam sororum (1) deficientia  
 [Plus septies denis ab annis]  
 Fila sinunt, hodievé, crasvé  
 Secunda duris forficibus; velint  
 Ut fata, rumpant stamina! Sed libet  
 Mori, mei Titi, meique  
 Aurelii (2) memorem, piun[que].  
 Suspiriis, tum quae precor ultimis,  
 Et Patriæ, Rex! et Tibi? publicis  
 Haec nempe, ceu olor canorus,  
 Adjiciam mea vota votis.  
 Felicitatem Gentis, et Imperi  
 Possis ad illum, quem cupis apicem  
 Efferre! Libertasque, Teque  
 Relligio Duce vim resonant;

- (1) *Parcarum.*  
 (2) *Titus et M. Aurelius innumeras suis veteribus amicis Statuas erexerunt.*

360,

5255/30128

— 4 —

Virtusque tempestatibus arduis  
Jactata, Regum Te melioribus  
    Accenseat: quo namque plus vel  
    Hercule pertuleris laborum,  
Augebit hoc plus posteritas Tuum  
Non desituris Nomen honoribus.  
    Ad gloriae metam perennis  
    Molle Viris iter est negatum.  
Beata posthac otia Dì Tibi,  
Aeterna Dì couivia praeparent;  
    Regis, Patris, Civisque, sanctis  
    Muneribus sapienter uso.  
Regni, Tuusque, o faxit id Indiges!  
Cujus beatos ad Cineres cremat  
    Thùs, in triumphali Vavelo (1)  
    Arx veteris sacra Carroduni (2):

- 
- (1) *D. Stanislaus in monte Vavelo.*  
(2) *Carrodunum, Ptolemaeo Cracovia.*



73462